

ASamuwel Aga Zəng

Amar aSamuwel

¹ Unəm uro uwa ka yà ka aRama kà mbin aZufim ka ashe mbin ngga aduktum aEfrayim. Adidin pa uElkana uya aJeroham, uya aElihu, uya àTohu, uya àZup ka akum ijili aEfrayim.

² Uza ká ochar pa oparəm, adin oza pa uHana ká uPənina. UPənina ká ovan, uHana nnyi te á yà ká ovan kat.

³ Nza izun nggo te, uElkana i wong kà itong wò i ga aShilo, kakul pa na ô nəm awop, kang ô na nləfər ûYawe uGa ngGatək. Ueli ká ovan wò oga oparəm uHopəni ká uFinehas òma onəm oga mpyal awop áYawe ka awalang va ta.

⁴ Nra va uElkana i yichi nləfər wò te, uza i na ngbak izhe iro ûchar wò uPənina, kang ovan aPənina onunggwan ká ochar uza i na ngbak pa nzəng udanggo.

⁵ Nnyi te, uza i na ûHana ndan pa mparəm, kakul pa uza man na man, káp ka nva pa uYawe gún atak amar kà na a.

⁶ Ukpəkpat i wong te, i náp avyal á na, na ô lak igwak á na kakul pa uYawe gún atak amar kà na.

⁷ Uza i náp avyal á na nza izun nggo. Awalang va káp uHana á ga awop kà nzhi aYawe te, uPənina i náp avyal a na, á nak na uza pak inok ayəng kang à yang ká nri iyam.

⁸ Te u**ə**bar u**El**kana i **ə**p na pa, <<ÁHana, bu yéng iza yà? Iza nak kang u ri iyam-nrì kat yà? Iza lak ìgwak a bu yà? Mmami te, n ji ovan onunggwan a bu pa ogbapchi kat dò?>>

⁹ Ka nda nro te, nvaŋva oza gba! ká nri ká ngwa chit ka aShilo, te uHana wong ka ashe nlak ìgwak i far afar ká ayéng ûYawe. Ka awalang va ta te, uEli unəm uga mpyal awop uwa ka yà kà ntəm ka apal itok wò ka izər ndar ngga anung nzhi aYawe.

¹⁰ UHana ka ashe nlak ìgwak pa gənggəng, nva uza kà nfar afar ká ayéng ûYawe.

¹¹ Uza yar nsar nnap-nlà, là pa, <<ÁYawe uGa ngGatək, a yà pa u dər mbək anung ázwal bu, kang u rəng ká mi, u kong ká uzwal bu kat, wa na uyen ununggwan á mi, te mi le ká na á bu. Uza i yà uji bu i ga i chu nkur iriririri, kang ìkpal ishi i yà ká ndok ishishi kat.>>

¹² Nva uza ka pak inok nfar afar ûYawe, te uEli wa kà ndər anunung.

¹³ UHana wa kà nfar afar ka ashe ìgwak wò, kang ichəchu mí fe kat, anunung na i ghap chwat, te uEli rəng pa nchè à ran na

¹⁴ kang uza là á na pa, <<Nkpak pa ú wá nchè ú ran ká kang bu ba ka ta dò? Re ngwa ndəng ibangbang bu.>>

¹⁵ UHana na aman pa, <<Ánəm uga nzhi mi, pa kat. Mmami uchar uva ka ashe nlak ìgwak pa gənggəng. Na ngwá ndəng ibangbang kat te nchè chit kat, mmami kà nlà ìgwak mi ûYawe.

¹⁶ Kang wa yar uzwal bu pa uchar uga nnəm mmai kat. N yar awalang va ta pa, n nəm afar

ka_kul ndaktak ká nlak ìgwak va n yà ishi mi kà á.>>

¹⁷ Te uEli là pa, <<Ga ká ikángkáng, re Inan iga aIsarila á na iyam va a bu u chal kà ná.>>

¹⁸ UHana là pa, <<Re uzwal bu á ya nnap-nnənan kà mpyal bu.>> Te uza ga iyam wò kang a ri iyam-nrì, kang ìgugwak lak lap kat.

¹⁹ Atak fa tàn ká ibotak te, oza wong kang oza wop uYawe. Te oza le nzhi oza ka aRama. UElkana ga atak nra kà uchar wò uHana, kang uYawe rəng ká na.

²⁰ Kang awalang ba chu te, uHana təm ká anyám, a mar uyen ununggwan, te uza sok adin á na pa, uSamuwel, uza là pa, <<N chál uYawe ka_kukul.>>

UHana yichi aSamuwel

²¹ Te uElkana ká nkpektak nzhi wò ga pa ô yichi nləfər ngga nza izun nggo ūYawe, na ô yəl nsar nnap-nlà wò kpa,

²² nnyi te, uHana ga ji wò kat. Uza là ūbar wò pa, <<UYen i re mbyal te, mi yar na kang mi ga ká na kà mpyal aYawe, kang uza i təm ka ta mbyetbyet.>>

²³ UElkana là á na pa, <<Nəm iyam va u ya ma ká bu. Lòk na uyen á re mbyal kang, re nnap-nlà aYawe á yəl.>> Te uHana təm kà nzhi dər uyen wò ga chu awalang va uyen re mbyal ká.

²⁴ Nvangva uyen re mbyal te, uHana yar na, ya uyen va ta uwa ubwakan nzəng ká ina inunggwan iga izun pa ishatding, ká mma_k kà ikpáng, ká abang ndəng ibangbang. Uza ba ká kà nzhi aYawe ka aShilo.

²⁵ Ka nvangva oza pà ina va ta chit, te oza ba ká uyen va ta ûEli,

²⁶ kang uHana là pa, <<Ánəm uga nzhi mi, yar mpat á mi, u rərəng ká mi na ta lap dò? Mmami na uchar va ka nsat ka ta kà mpyal bu, kang i far afar ûYawe á.

²⁷ UYen va ta ka n far ûYawe pa á na mi, kang uza na iyam va á mi chit ka n chal ka atətak.

²⁸ Nyangmatə mmami kà nná na ûYawe. Kang nkpaktak nra iriririri, uza yà ujini chit.>> Te uza wop uYawe ka ta.

2

Afar aHana

¹ Kang uHana nəm afar a là pa,
<<Mmami ká nchàng ìgwak kakul aYawe.

UYawe nak ikam yà ka mi chit.

M maƙan okpa ikum mi chit.

Mmami kà nchang ìgwak kakul pa u kam ishi mi.

² Unəm uro yà uyéryər wa aYawe kaƭ,
uwa byet unəm uro yà lap kaƭ.

ÎPang iro yà wa Inan yi kaƭ.

³ Kang ó là nnap-nlà ngga nrup ká ishi
kaƭ te ó re anung wó á là nnap-nlà ngga nkak ishi kaƭ.

Kakul uYawe uwa Inan va nyi,
kang uwa i mál nnap nnəm wó.

⁴ Ijang oshozha oga ñnyi ikum bun chit,
ñnyi te, onəm oga nyà ká ikàm kaƭ yà onəm okamkàm chit.

⁵ Onəm va_ka_ yà ká iyam-nrì pa_ makmak matmat
te, ñyangmata_ oza_ kà_ nnəm inok kakul
nram iyam-nrì,
ñnyi te, onəm va_ka_ yà ká_ ayang te, afu yəl
oza_ chit.

Uchar va_ka_ səsət te, á mar ovan chit pa_ ofang-
shat,
ñnyi te, uchar va_ka_ mar ovan pa_ kyák te, á
təm ulakchi chit.

⁶ UYawe uwa_ ba_ ká_ ikú kang uwa_ na_ irirì.
Uwa_ ga_ ká_ onəm ka_ ashe awap kang uwa_ à
wong ká_ oza_ kpa.

⁷ UYawe uwa_ na_ nkun oro kang uwa_ na_ idur oro.
Uza_ yen ká_ oro kang à_ rup ká_ oro.

⁸ Uza_ wong ká_ oga nkun ka_ ashe mbwang,
kang uza_ wong ká_ oga nlang ka_ apal isal,
uza_ nak oza_ təm nzəng ká_ onəm oga atak nsat,
kang á_ nak atak ntəm nchumchum yà
iyamkup oza_.

Oga mbang apambin nji aYawe.
Ka_ apal oza_ na_ uza_ pak apambin.

⁹ Uza_ i_ kpak ashar onəm wò oga nnandər,
ñnyi te, onəm obángbàng i_ zhì ka_ ashe atak
kparkpar,
ka_ atak ikàm na_ unəm i_ ya igwan kat.

¹⁰ Onəm va_ yang uYawe te, oza_ i_ zhì.
UGa_ iChumchum i_ nəm igbarman ka_ apabur,
uYawe i_ náp akwali nkpaktak apambin.
Uza_ i_ na_ ikam ūponzhi wò,
kang uza_ i_ rup ká_ agbəshi anəm ugargar
wò.>>

11 Te uElkana le nzhi ka aRama, ñnyi te, uSamuwel təm nnəm inok ũYawe ka ashe awo aEli, unəm uga mpyal awop.

Inga ovan aEli onungwan

12 Ovan aEli onungwan onga, oza ya ká ayər ũYawe kat.

13 Asa va ta na ka ya nnap nnəm onəm oga mpyal awop pa, awalang va kap unəm uro i yichi nləfər te, ukpari anəm uga mpyal awop i ba ká igapchi iga ifang pa ishatding ká awo wò, ya izhe ya kà nfəl ka apər.

14 Uza i kyər igapchi iga ifang va ta ka ashe ngbət kang iyam va igapchi fa ká te, i ya iji ánəm uga mpyal awop. Asa va ta oza nəm ngkpaktak oIsarila va ba aShilo.

15 Ñnyi te, kang mí shì mpip te, ukpari anəm uga mpyal awop i ba i là ũnəm va kà ñyichi nləfər pa, <<Ná izhe ìro na mmá wàng ũnəm uga mpyal awop, uza i ya ká nkam ipəkpək ka atak bu kat, ya ilulong chwat.>>

16 A ya pa unəm uga ñyichi nləfər a là á na pa, <<Re mmá shì mpip mpyal kang bu kpak wa nva u dom,>> te ukpari anəm uga mpyal awop i na aman pa, <<O'o, na mi ñyangmata, kang a ya pa kat, te mi kpak ká ifan.>>

17 Nnap-mbángbang ovanzam va ta mak byet ká mpyal aYawe, kakul oza vyap oga iyam inana áYawe.

USamuwel ka aShilo

18 Ñnyi te, uSamuwel, uwa ka nnəm inok ũYawe, uyen va ta pá ilukwan ikwoksok iga alinin.

19 Nza ìzun nggo te, unənan*g* i dān ìlukwan ìwángwang kang i ga á na ka awalang va uza ká ubar wò i ga pa ô yichi nləfər ngga nza ìzun nggo.

20 U*E*li i pa*r* uElkana ká uchar wò, i là pa, <<Re uYawe á na ovan oro a bu ka atak achar va ta ka anung ava uza far afar ká kang uza na ũYawe á.>> Te oza i le i ga nzhi.

21 Kang uYawe dər uHana ká adər, uza mar ovan onunggwan pa oshatđing ká ovan ochar pa oparəm. Nnyi te, uyen va ta, uSamuwel rup ká mpyal aYawe.

UEli ká ovan wò

22 Nyangmata uEli gbák chit pa gənggəng, kang ká nfe nkpaktak iyam va ovəvan onunggwan ká nnənəm nkpaktak oIsarila ká nva oza i ra ká ochar va ká nnəm inok ka anung asal Aghal Mbut á.

23 Te uza là óza pa, <<Iza nak kang ó nəm oga nnàp wa nva ta yà? Kákul n fe ka atak nkpaktak onəm oga nnap nnəm nnga va mmawó ká nnənəm á.

24 Ó re, óvan mi, á byen kat, iyam va onəm aYawe ká nləlà ka apal ishi wó te, a bang byet.

25 A yà pa unəm nəm nnap-mbángbang ũwan wò te, Inan i chal kakukul, nnyi te, a yà pa unəm nəm nnap-mbángbang ũYawe te, uda i chal kakukul yà?>> Ká nna te, ovəvan onunggwan yang ká nkpak nnap-nlà apo oza, kákul uYawe ka nak chit pa ô gbáng oza.

26 Nnyi te, uyen ununggwan va ta, uSamuwel ga mpyal ká nrup, kang nchəchər bal ká mpyal aYawe ká onəm.

Nlà nre Inan ka apal nzhi aEli

²⁷ Nda aro te, unəm Inan ba atak aEli kang à là á na pa, <<Iyam va ta uYawe là, <Ka n nyám ishi mi ôkəka bu ka awalang va oza ka ya kə nnəm izwal ūponzhi uga aMasar kat dō?

²⁸ N yak akum akəka bu ka ashe nkpaktak aIsarila pa á yà onəm oga mpyal awop mi, pa á ga atak nshì iyam awop mi, á shì njəng nnəngnəng nchángchàng, á pá ilukwan ikwoksok ka mpyal mi. Kang n na nzhi akəka bu nkpaktak oga nləfər va oIsarila yichi á.

²⁹ Iza nak kang ó nəm vyákshin ká nləfər ká iyam inana va n nak kakul mi yà? ÁEli, iza nak kang u na ichumchum ôvan bu na ji mi ka atak nnak ishi ká ishi wó, ó mwal nva o ri ka ashe iyam iyakyak va onəm mi oIsarila yichi á mi yà?>

³⁰ Kakul nva ta te, uYawe, Inan iga aIsarila, là pa, <Ka n yar nsar nnap-nlà chit pa mmabu ká nzhi bu ó tong onəm oga mpyal awop á mi mbyet.> Nnyi te, nyangmata uYawe là pa, <Á yà pa lap kat, kakul ovəngva na ichumchum á mi, te mi rup ká oza, nnyi te, ovəngva bak mi, te mi yen ká oza.

³¹ Dər, awalang na kə mba ava mi gbáng ovanzam oga nzhi bu ká akum ijili bu. Kakul nva ta te, mí yà ká nya unəm uro i gbák kə nzhi bu lap kat,

³² kang bu ya ndaktak. Ka nna te, mi nak nnap-nnənan ka apal aIsarila, nnyi te, ka ashe nzhi bu te, mí yà ká nya unəm uro i təm i ga i gbák kat.

³³ Mi yà ka mgbang nkpaktak akum ijili bu kat, nnyi te, unəm va mi re ká irirì pa a yà unəm uga

mpyal awop á mi, te uza i təm ka ashe igwak ilaklak ká ador kang uza i fo. Te nkpaktak oga akum ijili bu ó kú ikú iga mbək anung.

³⁴ << Kang iyam va i ya ovan bu onungwan oga oparəm, uHopəni ká uFinehas te, i nyám ipir nnap a bu, oza i kú ká nda nzəngtəng.

³⁵ Kang mi wong ká unəm uga mpyal awop mi uga nnandər, uva i wop mi kang i nəm iyam va igwak mi dom á. Mi nak nnap-nnənan nzhizhi, kang oza i təm mbyet kà mpyal aponzhi mi ugargar.

³⁶ Kang unəm va re ká irirì kà nzhi bu te, i kuchi ka mpipyal i chál mbwai ká iyam-nrì. Uza i chál pa, <<Mmá na inok iro á mi iga mpyal awop, na n ya iyam-nrì n ri.>> > >>

3

UYawe wór uSamuwel

¹ Nnyi te, uyen unungwan va ta, uSamuwel uwa ka nnəm inok uYawe, ka ashe awo aEli. Ka ashe oga nra va ta te, uYawe mà man nlà nnàp ká onəm pe kaɾ, kang oga alár bal pe kaɾ kpa.

² Nda nro ká izwam te, uEli va i ya atak dakdak lap kaɾ, uwa kà nra ka atak nra wò.

³ Nna mmá gbaɭ apitila Inan chit kaɾ, kang uSamuwel uwa ka nra ka ashe nzhi awop aYawe dát ká atak va mí nak akwati aga nsar nnap-nlà Inan kà.

⁴ Te uYawe wór uSamuwel, kang uSamuwel man pa, <<Mmami na ta.>>

⁵ Kang uza chər ga atak aEli, uza là pa, <<Mmami na ta, u wór mi.>>

Ñnyi te, uEli là á na pa, <<N wór bu kaṭ, le ga ra.>> Te uSamuwel le ga ra.

⁶ UYawe wór kàḍi pa, <<ÁSamuwel>> Te uSamuwel wong kang à ga atak aEli, là pa, <<Mmami na ta, u wór mi.>>

Te uEli là pa, <<N wór bu kaṭ áyen mi, le ga ra.>>

⁷ Ñnyi te, uSamuwel uwa ka nyi uYawe chit kaṭ, kaḱul uYawe uwa ka nyám ká nnap nla wò á na chit kang kaṭ.

⁸ Kang uYawe wór uSamuwel kàḍi ngga nshatḍing. Te uSamuwel wong kang a ga atak aEli là pa, <<Mmami na ta, u wór mi.>>

Nna chit te, uEli nyi ḍak pa uYawe i wór uyen ununggwan va ta.

⁹ Te uEli là ũSamuwel pa, <<Ga, na ú ra kang a ya pa uza a wór bu kàḍi te, là pa, <Là, áYawe, kaḱul uzwal bu ka nggwong achwang.>> Te uSamuwel le kang à ga ra ka atak nra wò.

¹⁰ Te uYawe ba sat ka ta i wór awór kàḍi wa nva uza ka wór pa, <<ÁSamuwel, áSamuwel.>>

Kang uSamuwel là pa, <<Là, kaḱul uzwal bu ka nggwong achwang.>>

¹¹ Te uYawe là ũSamuwel pa, <<Mmami kà ngga nnəm iyaṃ iro ka ashe aIsarila iva unəm va pa kap i fe ka achwang wò te, i gaṃ.

¹² Nda va ta te, mi yél nkpaktak iyaṃ va n là ka apal ishi aEli ka nzhizhi, kà mbəban i ga i chu nkukur.

¹³ Ka nlələ á na pa mi ga nnáp-akwali nzhizhi mbyet, kaḱul nnap-mbángbàng va uza nyi ka apal ovan wò onunggwan nva oza vyap aḍin aYawe, ñnyi te, uza ḍaṭ oza kaṭ.

14 Kəkul nva ta te, ka n sɔng anung n̄zhi aEli pa, <Nlɛfər nro kat te iyam inana iro ya iva mɪ yichi pa á yar nsur nnap-mbángbáng n̄zhizhi kat mbyet.> >>

15 USamuwel ra atak fa tan, kang uza bol oga anung nzhi agga ntar nzhi aYawe. Uza nəm ayər nlà ûEli iyam va uYawe là á na ka ashe alár,

16 ñnyi te, uEli wór na kang à là pa, <<ÁYen mi, uSamuwel.>>

Te uSamuwel man pa, <<Mmami na ta.>>

17 Te uEli bəp na pa, <<Iza uYawe là a bu ya? Kang wa bwam iyam iro ka mi kat. Re Inan á vyap bu, a ya pa u bwam iyam iro ka mi ka ashe nkpaktak iyam va uza là á bu á.>>

18 Te uSamuwel là iza nggo á na, a bwam iyam iro ka na kat. Nna chit te uEli là pa, <<Uza uwa uYawe, re uza á nəm iyam va uza ya byen á.>>

19 USamuwel rup, kang uYawe uwa ya nzəng ká na, kang nkpaktak iyam va uSamuwel là te, Inan nak á yəl.

20 Te nkpaktak oIsarila, bən ka aDan ka asal mpal ga chu aBeyersheba ka asal nkwandal, nyi đak pa uSamuwel, unəm uga nkam nre ka atak Inan uva uYawe à re.

21 UYawe pak inok nnyám ishi wò ka aShilo, kang ka ta uza nyám ishi wò ûSamuwel ka atak nnap-nlà wò.

4

1 Kang nnap-nlà aSamuwel ba nkpaktak oIsarila.

OFilisti vyat akwati aga nsar Nnap-nlà

Te oIsarila fa ikum kà oFilisti, kang oza ra apak ka aEbenezer, nnyi te oFilisti ra apak ka aAfek.

² OFilisti gbar izər pa ó lung oIsarila, kang awalang va ikum sur te, oFilisti nəm igwan ká oIsarila, kang a gbáng oza ikalong pa ineding ka mpyal ikum va ta.

³ Awalang va oshozha le apak te, onəmgbak oIsarila bəp pa, <<Iza nak kang uYawe re oFilisti nəm igwan ká yi nda ata yà? Re i ba ká akwati aga nsar nnap-nlà aYawe ka aShilo, na uza á kam ishi yi ka ashe awo okpa ikum yi.>>

⁴ Te oza re onəm ga aShilo, kang oza ba ká Akwati aga nsar nnap-nlà aYawe uGa ngGatək, uva tēm ka ishimshe oga akerup. Kang ovan onungwan aEli oga oparəm, uHopəni ká uFinehas, oma ka yà ka ta ká akwati aga nsar nnap-nlà Inan.

⁵ Kang awalang va akwati aga nsar nnap-nlà aYawe fa chu ashe apak te, nkpaktak oIsarila bà achu kang mbin yənggət.

⁶ Awalang va oFilisti fe mbà achu te, oza bəp pa, <<Iza nak kang achu i bà wa nta ka ashe apak onəm aIbərahim yà?>> Nvangva oza fe pa mmá ba ká akwati aga nsar nnap-nlà aYawe chit ka ashe apak,

⁷ te ayər nəm oFilisti, oza là pa, <<Inan à ba ashe apak.>>Te oza là pa <<Á kùr ká yi chit, kakul nna mmá nəm apir iyam chit wa ivə ta kat.

⁸ Á lak ká yi chit. Uda i kam ishi yi ka ashe awo oga inan ichumchum va ta yà? Oga inan va ta gbáng onəm oga aMasar ká apir oga ndaktak pa dōngdōng ka ashe nzam.

⁹ ÓFilisti, ó nəm nkám ìpang, ó lung oza, kakul na kang ó nyáng ozwal onəm albərahim wa nva oza ka yà ozwal wó kat. Ó tong pa kakkərak wa onunggwan, ó lung ikum.>>

¹⁰ Te oFilisti lung ikum va ta ká nkpaktak nkàm oza, kang oza ri oIsarila, oshozha oIsarila chəng, udanggo kpán asal aghal wò. Mmá gbáng oIsarila pa makmak, kang onəm va mmá gbáng te, ikalong isəm pa ishatding.

¹¹ Mmá vyat akwati aga nsar nnap-nlà Inan, kang ovan onunggwan aEli oga oparəm, uHopəni ká uFinehas, mmá gbáng kpa.

Iku aEli

¹² Unəm uro ka akum ijili aBenjamin chər ka atak ikum ba chu aShilo ka nda va ta. Uza ká ilukwan ikankan kang ká mbwang ka ishi wò.

¹³ Awalang va uza ba chu te, uEli uwa ka yà ka ntəm ka apal iyam ntəm wò ka ngbak asal pa na ô fe nnap ikum va, kakul igugwak ra ka apal akwati aga nsar nnap-nlà aYawe va kat. Awalang va unəm va ta tar ashe itong kang à là kpaktak iyam va fa onəm te, nkpaktak itong bà ká ayéng.

¹⁴ UEli fe mbà ayéng te, uza bəp pa, <<Iza mí bà ayéng kà yà?>>

Te unəm va ta ghan ba kang à là uEli iyam va fa.

¹⁵ Ka awalang va ta te, uEli ká izun isəm pa ifangzəngtəng aman pa nanne kang uza fo chit, i ya atak lap kat.

¹⁶ Uza là uEli pa, << N chər ka atak ikum, m ba nda ata.>>

Te uEli bəp pa, <<Áyen mi, iza kà ngga yà?>>

17 Te unəm və bə kə nggwol və tə nə aman pə, <<Oİsarila chəng kə mpyal oFilsti, kang oFilsti gbəng onəm pə makmak nžəng kə ovan bu onungwan oga oparəm, uHopəni kə uFinehas. Kang mmá vyat akwati aga nsar nnap-nlà Inan kpa.>>

18 Nvangvə uEli fe nnap akwati aga nsar nnap-nlə Inan və tə te, uza ru kə asal nsəm kə apal itok wò kə anung asal itong. Kang uza bəkchi ishak, uza kú, kakul uza unəm ugbakgbak umwalmwal. Uza kə yə unəm uga mpyal oİsarila izun isəm pə ineding.

19 Uchar à yə aEli, uFinehas kə yə kə anyám, á dát kə amar chit. Awalang və uchar və tə fe pə mmá vyat akwati aga nsar nnap-nlə Inan chit, kang pə ukəka kə ubəbar oza kú chit kpá, te nrwa afu amar wong kə nə, uza kúchi mar te, uza kú.

20 Uza kə anung ikú te, ochar və kə nnak ishi kə nə là á nə pə, <<Kang ayər á nəm bu kat, kakul u mar uyen unungwan>> Nnyi te, uza nə aman kat, kang uza nak ishi kə oza kat.

21 Te uza sok adin ūyen və tə pə ulkabot, uza là pə, <<İzhàn kap kə aİsarila chit.>> Kakul mmá vyat akwati aga nsar nnap-nlə Inan chit, kang ukəka kə ubəbar kú chit kpá.

22 Uza là pə, <<İzhàn kap kə aİsarila chit, kakul mmá vyat akwati aga nsar nnap-nlə Inan chit.>>

5

Akwati aga Nsar Nnap-nlə Inan kə awo oFilsti

¹ Kà nvəngvə oFilisti vyat akwati aga nsar nnap-nlà Inan chit kà atak ikum kà aEbenezer, te oza ga ká kà aAshdot.

² Oza yar akwati aga nsar nnap-nlà Inan nak kà ashe nzhi aDagon, oza nak datkulung ká aDagon.

³ Nvəngvə onəm oga aAshdot wong ká ibotak te, oza ya aDagon ru chit zəp ká afu kà mpyal akwati aga nsar nnap-nlà aYawe. Te oza yar oza yal kà atak nvəvəng.

⁴ Nnyi te, atak fa tən ká ipin kang oza wong te, oza ya aDagon ru chit zəp ká afu kà mpyal akwati aga nsar nnap-nlà aYawe. Ishishi ká oga awuwo bun ra kà anung asal, izəzər na le chwat.

⁵ Iyam va ta nak kang ba chu nda va ta te, onəm oga mpyal awop aDagon kat te nkpaktak ovəngvə i táng ashe nzhi awop aDagon pa ó wop na, i tòng anung asal nzhi aDagon kà aAshdot kat.

⁶ UYawe nyán ká onəm oga aAshdot, ká oga atak va gáng na ká arwa oga nsomo.

⁷ Onəm oga aAshdot ya chit pa te, oza là pa, <<Kang i re akwati aga nsar nnap-nlà Inan oIsarila a təm kà atak yi kat. Kəkul Inan oIsarila kà nnyán ká yi ká inan yi aDagon.>>

⁸ Te oza re nre mmá but nkpaktak oponzhi oFilisti, kang oza bəp pa, <<Iza í nəm ká akwati aga nsar nnap-nlà Inan oIsarila va ta yà?>>

Te oponzhi va ta na aman pa, <<Mmá yar akwati aga nsar nnap-nlà Inan oIsarila, mmá ga ká kà aGat.>> Te oza yar ga ká kà aGat, itong oFilisti iro.

⁹ Nvəngvə oza ga ká chit kà aGat te, uYawe nyán ká onəm oga itong va ta. Ovan ká onəmbak, uza

lèp kpaktak oza ká arwa oga nsomo.

¹⁰ Te oza re nre ká akwati aga nsar nnap-nlà Inan ga aEkron.

Awalang va akwati aga nsar nnap-nlà Inan va ta ba chu aEkron te, onəm bà ayəng, oza là pa, <<Oza ba ká akwati aga nsar nnap-nlà Inan oIsarila ka ta pa na á gbəng yi pa chatchat.>>

¹¹ Te oza wór nkpaktak oponzhi oFilisti ka atak zəngtəng, kang oza là pa, <<Ó re nre ká akwati aga nsar nnap-nlà Inan oIsarila á le atak va fa ká, kaṭ te i gbəng yi ká onəm yi.>> Arwa abəngbəng ka atak Inan á bən chit ka ashe itong kakul Inan ká nnyán ká itong va ta.

¹² Onəm va kú kaṭ te, mmá lèp oza ká nsomo, kang ayəng onəm ba chu apabur.

6

OFilisti le ká aKwati aga Nsar Nnap-nlà Inan ka aIsarila

¹ Ká nvəngva akwati aga nsar nnap-nlà aYawe nəm ape pa fangshat ka ashe mbin oFilisti te,

² oFilisti wór onəm oga mpyal awop ká onəm oga ivak, bəp oza pa, <<Iza í nəm ká akwati aga nsar nnap-nlà aYawe va ta yà? Ó là á yi asal va í nəm kang í le ká ka atak nvəvəng.>>

³ Oza na aman pa, <<A yà pa ó le ká akwati aga nsar nnap-nlà Inan oIsarila te, kang ó re á ga pa alakchi kaṭ, nkpak ó na iyam inana iga nyar mpat á na. Nna chit te ó ya ikánkáng kadi, kang ó nyi ipir iyam va nak kang uYawe re nyan ká wó kaṭ.>>

⁴ OFilisti bəp pa, <<Nza apir iyam inana iga nyar mpat a mál pa í re nre ká yà?>>

Te oza na aman pa, <<Ó la oga nsomo ngga azənariya pa ntukun ká ipí pa itukun iga azənariya ka apal iyəl oponzhi oFilisti, kakul arwa azəngtəng na ya wó ká oponzhi wó.

⁵ Ó la apir oga nsomo va nəm wó, ká apir ipí va vyap iyam ka mbin wó, na ó na ichumchum Ínan oIsarila. Mwote uza i yar mbək anung va ta i le a wó ká oga inan wó, kang ká mbin wó nggo.

⁶ Iza nak kang ó twat igwak wó wa onəm oga aMasar ká uponzhi oza yà? Nvangva uYawe nyán ká oza chit pa gənggəng te, oza re onəm oIsarila kpan asal ga kat dò?

⁷ <<Nyangmata te, ó nəm akeke ina apipe, te ó ran ina pa iparəm iva ivan oza na ka mmá mbyal, iva na mmá ran ayok ôza chit kat, nnyi te, ó re ivan oza ka ashe afo.

⁸ Te ó yar akwati aga nsar nnap-nlà aYawe va ta, ó nak ka apal akeke, te ó nak oga iyam va ó la ká azənariya ka ashe akwati aro ka ngbəgbək, iva ó re nre ká ũYawe wa iyam inana iga nyar mpat. Te ó re na á fa á ga asal wò,

⁹ nnyi te, ó dər. A yà pa a kpán asal aBet-Shemesh te, í nyi pa uYawe uwa i nyán ká yi, kang a yà pa kat te, í nyi pa uwa i nyán ká yi kat. Á ya yi pa mwang.>>

¹⁰ OFilisti nəm wa nva mmá là ôza. Oza wur ina iga ivan pa iparəm ran akeke ina ôza, kang oza kùk ivan oza ka ashe afo.

¹¹ Te oza nak akwati aga nsar nnap-nlà aYawe ka apal akeke ina ká akwati oga nsomo ngga azənariya ká ipí iga azənariya ka ngbak akwati aga nsar nnap-nlà aYawe.

¹² Oga ina v̄a ta kpán asal nzwang i ga aBet-Shemesh, oza k̄a ngga oza k̄a ñyóng. Oza lyep awo ari kat̄ te ap̄eram kat̄. Oponzhi oFilisti w̄a nv̄ang oza ga chu aswari aBet-Shemesh.

¹³ Ñyangmata te, onəm oga aBet-Shemesh ka mb̄ən ñangzəng oza k̄a ashe mbandam, kang awalang v̄a oza wong k̄a iwú, kang oza ya akwati aga nsar nnap-nl̄a te, ñgwak nchang oza k̄a nya akwati v̄a ta.

¹⁴ Akeke ina v̄a ta tar ashe ñram aJoshuwa uga aBet-Shemesh kang à sat k̄a ta, k̄a ngbak̄ ñang ñpang. Te onəm ghak akun akeke ina v̄a ta màk ap̄er k̄a kang oza yichi ina v̄a ta iyam inana iga nsh̄i pā ðwot ûYawe.

¹⁵ OLawi yar akwati aga nsar nnap-nl̄a aYawe v̄a ta k̄a akwati v̄a k̄a ngb̄əgbak̄, ava mmá nak oga alakan v̄a mmá n̄əm k̄a azənariya k̄a ashishe, kang oza nak k̄a apal ñang ñpang v̄a ta. Te onəm oga aBet-Shemesh yichi iyam inana iga nsh̄i pā ðwot k̄a nl̄əf̄ər ûYawe ñda v̄a ta.

¹⁶ Oponzhi oFilisti oga otukun v̄a ta ya te, oza le ñda va ta ga aEkron.

¹⁷ Oga nsomo ngga azənariya v̄a oFilisti re nre k̄a wa iyam inana iga ñyar mpat ûYawe te, oma ta, pā zəng kakul aAshdot, pā zəng kakul aGaza, pā zəng kakul aAshəkelon, pā zəng kakul aGat kang pā zəng kakul aEkron.

¹⁸ Kang ipí iga azənariya k̄a anung oga itong oFilisti iga itukun v̄a ta, iva iji oponzhi oga otukun v̄a ta, oga itong iga akamsəlang k̄a ivan itong iva yà k̄a akamsəlang kat̄. Ñang ñpang v̄a oza nak

akwati aga nsar nnap-nlà aYawe kà te, ì ya yà n̄da
vā tā kà ashe ìram aJoshuwa uga aBet-Shemesh.

¹⁹ Te uYawe gbáng onəm oga aBet-Shemesh
isəm pā ifangshat kakul oza dər ashe akwati aga
nsar nnap-nlà aYawe. Iyam vā tā nak onəm oga
aBet-Shemesh yéng ikú pā gənggəng.

²⁰ Kang onəm oga aBet-Shemesh bəp pā, <<Uda
kúr nsat kà mpyal aYawe, Inan iyéryər vā tā yà?
Í re akwati aga nsar nnap-nlà vā tā i ga che kang
i kap ká yi yà?>>

²¹ Te oza re onəm oga nre kà atak onəm oga
ntəm kà aKiriyat-Jeyarim pā, <<OFilisti le ká
akwati aga nsar nnap-nlà aYawe chit, ó ba na ó
yar á ga kà atak wó.>>

7

¹ Te onəm oga aKiriyat-Jeyarim ba yar akwati
aga nsar nnap-nlà aYawe ga ká kà nzhi aAbi-
nadap kà apal aduktum. Kang oza gár uyien
uEleyazar pā á pángchí akwati aga nsar nnap-nlà
aYawe vā tā.

USamuwel nəm igwan ká oFilisti ká aMizpa

² Akwati aga nsar nnap-nlà vā tā təm kà
aKiriyat-Jeyarim awalang pā makmak, a ga chu
izun isəm pā iparəm. Kà awalang vā tā te,
nkpaktak oIsarila gaban yéng kà mpyal aYawe pā
á kamshi wó.

³ Te uSamuwel là nkpaktak oIsarila pā, <<A yà
pā mmawó kà nle atak aYawe ká nkpaktak igwak
wó te, ó swang oga inan iga mbin nro ká inan
aAshtoret kà ashe wó, na ó nak igwak kà atak

aYawe, ó wop uwa byet, te uza i kamshi wó ka ashe awo oFilisti.>>

⁴ Te oIsarila swang oga aBaal ká oga aAshtoret kang oza wop uYawe wa byet.

⁵ Te uSamuwel là pa, <<Ó but nkpaktak oIsarila ka aMizpa, te mi far ûYawe kakul wó.>>

⁶ Awalang va oza but ka aMizpa te, oza dàp ndəng sháng kà mpyal aYawe. Oza yar ndəng gbàl ká nda va ta kang oza là pa, <<Í nəm nnap-mbángbàng ûYawe chit.>> Nyangmata te, uSamuwel kà yà kà nnəm iponzhi oIsarila kà aMizpa.

⁷ Awalang va oFilisti fe pa oIsarila but chit ka aMizpa, te oponzhi oFilisti kyen ga pa na ó ru oza kà ikum. Kang awalang va oIsarila fe te, ayər nəm oza kakul oFilisti.

⁸ Te oza là ûSamuwel pa, <<Í chal bu, kang wa re nfar afar ûYawe, Inan yi kakul yi kat, na mwote uza á kamshi yi kà ashe awo oFilisti nggo.>>

⁹ Te uSamuwel kpán ìya ìtam iga mma mbyal kang à yichi na iyam inana iga nshì pa dwot ûYawe. Te uSamuwel far ûYawe kakul oIsarila, te uYawe man á na.

¹⁰ Nva uSamuwel kà nyichi nləfər va ta ká iyam inana iga nshì pa dwot ûYawe te, oFilisti kà mba pa ó ru oIsarila ká ikum. Te uYawe ləp igbarman ká nda va ta kà apal oFilisti, te a na ayər ôza, kang oza le nvaŋ chəng kà mpyal oIsarila.

¹¹ Te oshozha oIsarila fa kà ashe aMizpa kang oza bak oFilisti, kang nəm inok ngbáng oza ga dat ká aBetkar.

¹² Te uSamuwel yar ipang nak ká ishimshe aMizpa ká aShen kang à na adin a na pa aEbenezer, uza là pa, <<Á ba chu ñyangmata uYawe wa ka nkamshi yi.>>

¹³ Wa nnà ta oIsarila nəm igwan ká oFilisti, kang oza táng aswari mbin oIsarila lap kat.

Ñnyi te, uYawe nəm inok nnyán ká oFilisti ka ashe nkpaktak nra aSamuwel.

¹⁴ Te mmá le ká oga itong oIsarila va oFilisti vyat ka oza á, bàn ká aEkron ga chu aGat, kang oIsarila kam oga aswari mbin oza kpa ka ashe awo oFilisti. Kang ntəm ikánkáng yà ká ishimshe oIsarila ká oAmori.

¹⁵ USamuwel nəm iponzhi oIsarila ka ashe nkpaktak nra iriririri.

¹⁶ Nza izun nggo te, uSamuwel i ranggang i ga aBetel, aGilgal ká aMizpa, kang uza i náp akwali oga itong va ta.

¹⁷ Te uza i le aRama nzhizhi, kang uza i náp akwali ôIsarila ka ta kpa. Kang uSamuwel me atak nshì iyam awop uYawe ka aRama.

8

OIsarila dom Uponzhi

¹ Awalang va uSamuwel gbák chit, te uza kyep ovan wò onungwan yà onəm oga mpyal oIsarila.

² Adin ayiyen uga ngəshi pa uJowel, kang uga uparəm pa uAbijah, kang oza nəm inok ka aBeyersheba.

³ Ñnyi te, ovəvan yar nnap-nnənəm kat. Oza gaḃan kakul nram mmak, oza i gaḃan nnandər

ka atak nkam iyam iga mmulam anung ka atak onəm.

⁴ Te nkpaktak onəm oga mpyal oIsarila but kang a ba atak aSamuwel ka aRama.

⁵ Oza là á na pa, <<Dər, ñyangmata u gbák chit, kang ovan bu onungwan yar nnap-nnəm bu ka. Kaku nva ta te, kyer uponzhi á yi, uva i nəm ká yi wa aboshi oga mbin.>>

⁶ Nva oza là pa, <<Kyer uponzhi á yi, uva i nəm ká yi,>> te nnap va ta dak uSamuwel, kang uza far afar uYawe.

⁷ Te uYawe là uSamuwel pa, <<Nəm ôza wa nva oza dom á. Kaku oza yang mmabu ka, oza yang mmami pa n ya uponzhi oza ka.

⁸ Á ban ka ashe nra va n fa ka oza kà mbin aMasar, á ba chu nda va ta, oza gaban asəm á mi, oza i wop inan iro, te wa nnà ta oza kà nnənəm a bu.

⁹ Ñyangmata te, nəm ôza wa nva oza dom, ñnyi te, dáp achwang oza pa gənggəng, là ôza apir iyam va uponzhi va ta i nəm ôza.>>

¹⁰ Te uSamuwel là onəm va bəp pa mmá na uponzhi ôza, nkpaktak iyam va uYawe là á.

¹¹ USamuwel là ôza pa, <<Asal va ta uponzhi va ta i nəm iponzhi wò ka apal wó, uza i wur ovan wó onungwan i nak i ya onəm oga nkwak akeke ipəripəri, oro i tong onəm oga nkwak ipəripəri, kang oro i chəng ka mpyal akeke ipəripəri.

¹² Kang uza i nak oro i ya onəm oga mpyal ikukum ka apal oshozha ikalong, kang oro ka apal oshozha isəm pa itukun, kang oro i wap irəram, kang i bən iyəyam á na kpa, oro i lá iyam ikum á na ká iyam akeke ipəripəri.

13 UPonzhi va ta i wur ovan ochar wó i nak i nyang onəm oga nnəm nturari, ká mpék iyam-nrì, ká ngwang nzəngkəng á na.

14 Uza i vyat iram wó inənən, ká iram ibəngbəng inənən, ká ikun mpyet wó inənən i na ônəm oga nnəm inunok.

15 Uza i kam uzəng ka apal agbapchi iga ipirkur ká iga ibəngbəng wó i na ônəm oga mpyal wó ká onəm oga nnəm inunok.

16 Uza i wur ozwal wó onunggwan ká ochar, ká ina* va byen ji ká oga azhaki wó, kakul nnəm inunok.

17 Uza i kam uzəng ka apal agbapchi iga iyamkang wó, kang mmawó ká ishi wó, ó tong ozuzwal.

18 Awalang va ta i ba i chu te, ó chal pa mmá kam ishi wó ka atak aponzhi va ta, nnyi te, uYawe i gwong achwang ká wó n̄da va ta kat.>>

19 Káp ka nna te, onəm va ta gwong achwang ka uSamuwel kat. Oza là pa, <<O'o, í dom uponzhi pa á nəm ká yi,

20 kakul na í yà wa aboshi oga mbin. Í dom uponzhi pa á nəm ká yi, kang i ləp mpyal á yi ka atak ikum.>>

21 Ka nvəngva uSamuwel fe nkpaktak iyam va onəm là te, uza là ûYawe iyam va oza là.

22 Te uYawe là ûSamuwel pa, <<Nəm ôza wa nva oza dom, kyer uponzhi ôza.>>

Te uSamuwel là oIsarila pa, <<Udanggo á le nzhi wò.>>

* **8:16 8.16** *ina ka ashe oga nsar nnap-nl̄a Inan nro te, á là pa ovan nzam.*

9

Mmá yak uShawulu uponzhi

¹ Unəm uga atak nsat uro uwa ka yà ka akum ijili aBenjamin, adidin pa uKish, uya aAbiyel, uya aZeror, uya aBekorat, uya aAfiya, uya aBenjamin.

² UKish uwa ká uyen ununggwan adidin pa uShawulu, uyenžam uro yà byen ji na ka ashe ovanžam oIsarila ka, kang uza mak ji nkpaktak oIsarila ká irup ashar pa zəng.

³ Nda nro te, oga azhaki aKish lar, te uza là uyen wò uShawulu pa, <<Ga ká ukpari mi uro na ó mwo oga azhaki va ta.>>

⁴ Te uShawulu ga nzəng ká uzəngtəng ka ashe okpari apupo, oza kyén ga aduktum mbin aE-frayim, ká mbin oShalisha te, oza ya azhaki va ta ka. Oza watar ga mbin aShayalim ká nna te, oza ya oga azhaki ka ta ka. Te oza lyam ga ashe mbin aBenjamin, káp ka nna te, oza ya oga azhaki va ta ka.

⁵ Nvəngva oza ba chu mbin aZup te, uShawulu là ukpari va ta pa, <<Re, í le nzhi kakul kang upo mi a le á ya ka ndaktak ka apal yi a ji oga azhaki va ta ka.>>

⁶ Nnyi te, ukpari va ta là á na pa, <<UNəm Inan uwa ka ashe itong* va ta uva mmá na ichumchum á na byet, iyam va pa kpaktak uza i là te, i yəl. Í ga atətak, mwote uza a là á yi atak va oga azhaki va ta kà nggo.>>

⁷ Te uShawulu bəp ukpari wò va ta pa, <<A yà pa í ga atak anəm va ta te, iza í na á na yà? Kakul nzəngkəng va ka ashe oga azhal yi te, á kúr chit,

* 9:6 9.6 Mwote aRama.

kang i yà ká iyam va pa i na á na kat. Mwote iyam iro nna yà dak bo?>>

⁸ Ukpari va ta na aman á na kàdī pa, <<Dər, na n yà ká azurfa pa dap, mi na ûnəm Inan va ta, te uza i nyám asal va á yi, í lyep kà.>>

⁹ Kà nra ngga nvang te, kà ashe mbin oIsarila, unəm va i dom pa ó ga ó fe kà atak Inan te, i là pa, <<Í ga atak anəm uga dər mpyal.>>Kakul unəm va mí wór pa unəm uga nkam nre kà atak Inan ñyangmata te, matmat te, mí wór pa unəm uga dər mpyal.

¹⁰ Te uShawulu là ukpari wò pa, <<Ichən va ta byen byet, í ga.>> Te oza kpan asal aga ngga ashe itong va unəm Inan va ta kà.

¹¹ Nva oza kà nkyén mba ngga aduktum itong va ta te, oza gwang ovanbyen oro kà nfa pa na ó ga ó dap ndəng, te oza bəp oza pa, <<Unəm va i dər mpyal te, uwa kà ta dō?>>

¹² Ovanbyen va ta man pa, <<À, uwa yà, ó ghan, ó ga ñyangmata, uwa kà mpyal wó. Uwa tar itong yi nda ata, kakul mmá kà ngga nnəm nləfər kà atak awop aga aduktum.

¹³ Kà ntar wó na byet te, ó ya na kang uza i ga atak awop aga aduktum kakul nri iyam-nri. Onəm i yà ká nri iyam kat, ya uza i ba i par nləfər kang. Nna chit te, onəm va mmá chal te, i ri iyam dak. Ó ga ñyangmata, ó ya na ya kà awalang a ta.>>

¹⁴ Te oza táng ga ashe itong va ta, kang nva oza kà ntáng te, oza gwang uSamuwel kà mba kà asal isu oza kà ngga atak awop aga aduktum.

15 Kang uShawulu i ba te, uYawe ka_ là nnap ûSamuwel chit pa,

16 <<İpin ká awalang wa nta, mi re nre a bu ká unəm ka_ ashe mbin aBenjamin. Gør na á yà unəm uga mpyal oİsarila, uza_ i fa ká onəm mi ka_ ashe awo oFilisti. Kəkul n ya mbək anung onəm mi chit, kang ayəng oza_ ba chu atak mi chit.>>

17 Awalang va_ uSamuwel ya uShawulu te, uYawe là á na pa, <<Unəm va ta_ ka_ nlà nnənap a bu, uwa i nəm iponzhi ká onəm mi.>>

18 Te uShawulu ga atak aSamuwel ka_ anung asal_ itong kang uza_ bəp na pa, <<Mmami ka_ nchal bu, nzhi anəm uga ndər mpyal ka_ che yà?>>

19 USamuwel na aman_ á na pa, <<Mmami na unəm uga ndər mpyal va_. Watar mpyal na í ga atak awop, kəkul n̄da ata_ bu ga nri iyam-nri nzəng ká mi. Kang ipin ká ibotak te, mi re bu na ú ga, kang mi là iyam va_ a bu pa_ kpaktak ka_ ashe igwak bu.

20 Kang á dak bu kà_ nnap oga azhaki va_ lár nra chit pa_ nshatđing nda ata_ kat, kəkul mmá ya oza_ chit. Mmami ka_ nlà a bu pa, mmabu ká_ nzhi apo bu na nkpaktak oİsarila kà_ nnak igwak kà.>>

21 UShawulu na aman_ pa, <<Mmami ka_ akum ijili aBenjamin, akum va yen ji ka_ ashe akum oİsarila, kang ka_ ashe akum aBenjamin te, mmami ka_ ashe nzhi va yen ji kađi lap. Te iza_ nak kang bu là nnap á mi wa nva_ ta_ yà?>>

22 Te uSamuwel kam_ uShawulu ká ukpari wò táng ká ka_ ashe nzhi mbut, kang uza_ nak oza_ ka_ atak ntəm kà_ mpyal onəm va mmá chal, ova i chu isəm pa_ ishatđing chu.

²³ Kang uSamuwel là ûnəm uga pək iyam-nrì pa, <<Ba ká izhe va ká n ná a bu, i va ká nlà a bu pa, u nak pađi á.>>

²⁴ Te unəm uga mpək iyam-nrì va ta yar isong izhe ká iyam va ká apəpal ba cher ká mpyal aShawulu. Kang uSamuwel là á na pa, <<Izhe va ta mmá nak á bu, ri, kakul n nak m̄mabu pa na u ri, ká awalang va ká nlà pa, <N chal onəmchən ká á.> >> Nda va ta te, uShawulu ri iyam nzəng ká uSamuwel.

²⁵ Ká nvəngva oza fəng chit ká atak awop aga aduktum kang à táng ashe itong te, uSamuwel là nnap ká uShawulu ká apal apal aga nzhi wò.

²⁶ Atak fa tan ká ipin te, uSamuwel wór uShawulu ká apal apal aga nzhi, a là pa, <<Gbar izər, mmami ká ngga nre bu na u kpan asal.>> Nvəngva uShawulu gbar izər chit, te uSamuwel fa ká na ga re ká apal asal.

²⁷ Nva oza ga dat ká nkur itong te, uSamuwel là ûShawulu pa, <<Là ûkpari bu pa à gəga kang.>> Te ukparikpari ga. Nna chit te, uSamuwel là á na pa, <<Sat ká ta, na n là nre Inan á bu.>>

10

USamuwel gar uShawulu uponzhi

¹ Te uSamuwel yar afal mmì mpyet zuk uShawulu ká ishi, uza fəkchi na kang á là pa, <<Mmami ká nnəm iyam va ta á bu kakul uYawe gar bu chit pa u yà uponzhi ká apal iyamkup wò, oIsarila.

² Nvəngva bu re mi n̄da ata te, bu gwang onəm pa oparəm dat ká awap aRahila ká aZelza, ká

aswari mbin aBenjamin. Oza i là a bu pa, <Oga azhaki va mmá ya chit, kang upo bu kong ká nnap oza chit, ñnyi te, uza ká ndaktak ka apal wó ñyangmata. Uza ka mbəp pa, <<Mi nəm sang ka apal ayen mi yà?>> >

³ <<Te bu ga mpyal ká achen bu ga bu chu atak inang ikun iga aTabor. Ka ta te, bu gwang onəm pa oshatding ova ka ngga nnəm awop Inan ka aBetel. Uro ká ivan ibəl pa shatding, uro ká nzəngkəng pa nshatding, kang uga ushatding ká ndəng ibəngbang ka ashe izəmbar.

⁴ Oza i re anung a bu kang i yichi nzəngkəng a bu pa mparəm, te bu kam ka oza.

⁵ <<Ka nvəvang te, bu ga aGibeya Inan, atak va oshozha oFilisti ra apak kà. Bu ga bu dat ká itong te, bu gwang idonkong onəm oga nkam nre ka atak Inan ká nfəng ka atak awop aga aduktum. Ká mpyal oza te, mmá ka nnəm abwa, ká abwa acham, ká iganggáng, ká mbur izur, ká ngbap nza, kang oza ká nlà nre Inan.

⁶ ARuhu aYawe i vāng ka apal bu ká ichum-chum, te bu là nre Inan, kang bu gaḅan bu wal unəm ukak.

⁷ Ka nvəngva oga iyam va ta fa chit, te wa nəm iyam iva pa kpaktak awo bu ya məma pa u nəm, kakul Inan ya yà nzəng ká bu.

⁸ <<Ga aGilgal kang mi ba. Mi ba mi ya bu ka ta kang mi yichi nləfər ngga nshì pa dwot ká iyam inana iga ntəm ikángkáng. Ñnyi te, nkpak pa u lok ka ta nra pa nfangshat ya ba mi chu, mi nlà iyam va a bu bu nəm kang.>>

Mmá kyer iponzhi ūShawulu

⁹ Nvəngvə uShawulu gəbən chit kà ngga, te Inan gəbən ìgugwak. Kang nkpaktak oga ñnyám ipir nnap və uSamuwel là te, á yél n̄da va ta.

¹⁰ Awalang və uShawulu ká ukpari wò ba chu aGibeya te, ìdonkong onəm oga nkām nre kà atak Inan ba gwang na, kang aRuhu Inan vàng kà apal ishishi ká ichumchum te, uza gwang ishi ká oza kà nlà nre Inan.

¹¹ Awalang və nkpaktak onəm və nyi na nyi kang a fe na kà nlà nre Inan nzəng kà onəm oga nkām nre kà atak Inan te, oza bəp owan oza pa, <<Iza ya uya aKish yà? UShawulu yà unəm uga nkām nre kà atak Inan chit kpa dō?>>

¹² Unəm uro kà ashe onəm oga atak və ta na aman pa, <<Uda upo oza yà?>> Kàkul nva ta te, á sat ngba nnap pa, <<UShawulu kà ashe onəm oga nkām nre kà atak Inan kpa dō?>>

¹³ Nvəngvə uShawulu gbəl ká nlà nre Inan chit, te uza kyen ga atak awop aga aɖuktum.

¹⁴ UKyan aShawulu bəp na ká ukparikpari pa, <<Ó ga che yà?>>

Te uza là pa, <<Í ga mmwo oga azhaki. Kang nvəngvə í ya pa, i ya kət, te í ga atak aSamuwel.>>

¹⁵ Te uKyan aShawulu là pa, <<Là á mi iyam və uSamuwel là á bu á.>>

¹⁶ Kang uShawulu là ûkyan wò pa, <<Uza là á yi pa mmá ya oga azhaki və chit.>> Ñnyi te, uza là iyam iro ûkyan wò kà apal nnap iponzhi və uSamuwel là á na kət.

¹⁷ USamuwel wór nkpaktak oIsarila kà mpyal aYawe kà aMizpa,

18 kang uza là ôza pa, <<Iyam va ta uYawe, Inan oIsarila là, <N fa ká aIsarila ka ashe aMasar, kang n fa ká wó ka akum ichumchum aMasar ká nkpaktak oga mbin va nyán ká wo á.>

19 Nnyi te, ñyangmata ó yang ká Inan wó chit, uva fa ká wó ka ashe nkpaktak mbək anung ká oga ndaktak wó. Kang ó là pa, <Pa kat, mmá kyer uponzhi á yi.> Nyangmata te, ó ba mpyal aYawe, akum ká akum, kang nzhi ká nzhi.>>

20 Awalang va uSamuwel ba ká nkpaktak akum ijili oIsarila ká mpyal aYawe te, mmá yak akum ijili aBenjamin ka atak mmàng ayək.

21 Te uza ba ká akum ijili aBenjamin nzhi ká nzhi, kang ayək ga ru ka apal akum aMatiri. Ká nkukur te, ayək ga ru ûShawulu uya aKish. Nnyi te, oza mwo na kang oza ya na kat.

22 Te oza bəp uYawe kədə pa, <<Unəm va ba chit ka ta dō?>>

Kang uYawe là pa, <<À, uwa bwam ka ashe iyam ibutbut.>>

23 Te oza ga ba ka na, kang nva uza sat ka ishimshe onəm te, uwa mak ji onəm pa kpaktak ká irup ashar pa zəng.

24 USamuwel là nḡkpaktak onəm pa, <<Unəm va ta uYawe yak pa á yà uponzhi wó. Unəm uro yà wa njini ka ashe nkpaktak onəm kat.>>

Te nkpaktak onəm bà achu pa, <<Re iriri aponzhi á gangáng.>>

25 Te uSamuwel nyám ônəm apir inok va uponzhi i nəm ká iva onəm i nəm ûponzhi. Kang uza lir ka apal awa achəndərchəndər, uza nak ká

mpyal aYawe. Kang uSamuwel re onəm le nzhi oza kàdì.

²⁶ UShawulu ga nzhi wò kpa kà aGibeya, nzəng ká onungwan oga nkám igwak, ovəngva Inan dok igwak oza.

²⁷ Nnyi te, onəm oro oga ndom ntəm ikánkáng kat là pa, <<Wa nsang kang unəm va ta i kam ishi yi yà?>> Oza bak na, kang oza yang ká ngga ká imwa á na. Ká nna te, uShawulu nak ishi ká oza kat.

11

UShawulu ri oAmmon ká ikum

¹ UNahash uponzhi uga aAmmon ba ru aJabesh Gileyat ká ikum. Kang nkpaktak onungwan oga aJabesh là á na pa, <<Yar nsar nnap-nlà ká yi, te í yà ozwal bu.>>

² Nnyi te, uNahash na aman pa, <<Mi yar nsar nnap-nlà ká wó kà apal iyam va ta na cwat pa, nza unəm nggo te, mi tur iwu iga awo ari á na, na á tal iyam iwuswa ngkpaktak oIsarila.>>

³ Te onəmgbak oga aJabesh là á na pa, <<Ná nra á yi pa nfangshat na í re nre ká onəm oga nre a ga kà ashe nkpaktak aIsarila kang. A yà pa, í ya unəm va i kamshi yi kat, te í na ishi yi a bu.>>

⁴ Awalang va onəm oga nre va ta ba chu aGibeya va uShawulu i təm kà kang à là nnap va ta onəm te, nkpaktak onəm bà ayéng.

⁵ UShawulu kà nle kà atak nshàng iram ká ina na byet, te uza bəp pa, <<Iza i dak onəm yà? Sang kang mí bà ayéng wa nta yà?>> Te oza là á na iyam va onəm oga aJabesh là.

⁶ Awalang va uShawulu fe nnap-nlà va ta te, aRuhu Inan vāng ka apal ishishi ká ichumchum, kang igwak lak na pa gənggəng.

⁷ Uza wur ina pa iparəm pa, nyat izhizhe pa nyimənyimən, kang a re onəm oga nre ká pa á ga ká ka ashe nkpaktak oIsarila, oza á là pa, <<Iyam va ta mí nəm ká ina ánəm va yang ká nyar nvang aShawulu ká uSamuwel ka atak ikum.>> Te ayər aYawe fər ka apal ishi onəm kang oza fa wa anəm pa uzəng.

⁸ Awalang va uShawulu but oza ka aBezek, kang uza kung onəm te, uza ya onunggwan oga aIsarila ikalong igbal pa ishatding, kang ovəngva ka aYahudi ikalong isəm pa ishatding.

⁹ Oza là onəm oga nre va mmá re ba pa, <<Ó là onunggwan oga aJabesh Gileyat, <İpin, awalang va alum i chu apal ndəng chit, te mí kam ishi wó.>> Nvangva onəm oga nre va ta ga là onunggwan oga aJabesh chit, te igwak chàng oza pa gənggəng.

¹⁰ Oza là ôAmmon pa, <<İpin te, í ga nna ishi yi á wó, na ó nəm iyam va pa káp ó dom nəm ka yi.>>

¹¹ Ká izwam te, uShawulu kap onunggwan idonkong pa ishatding. Kang ká ibotak oza ba táng ashe apak oAmmon, kang à gbəng oza ga chu alum ka apal ndəng. Ovəngva lár te, oza lyangshin, bu ya ká nya onəm pa oparəm ka atak azəngtəng kat.

Iponzhi aShawulu təm

¹² Te onəm là ûSamuwel pa, <<Oda va ka là pa, <UShawulu i nəm iponzhi ka apal yi kat> yà? Mmá ba ká oza á yi na í gbəng oza.>>

¹³ Nnyi te, uShawulu là pa, <<Mí yà ká ngba_l unəm uro n̄da ata ka_t, ka_kul n̄da ta_l uYawe ba ká nkam ishi ngga irirì ôlsarila chit.>>

¹⁴ Te uSamuwel là ônəm pa, <<Ó ba, re í ga aGilgal na í nyám ká iponzhiponzhi kàd̄i.>>

¹⁵ Te nkpaktak onəm ba ga aGilgal, kang à kyer uShawulu ká mpyal aYawe təm uponzhi. Ka ta te, oza yichi iyam inana iga ntəm ikánkáng ûYawe, kang uShawulu ká nkpaktak oIsarila nəm nchàng izər pa gənggəng.

12

USamuwel là nnap ngga nkur anung

¹ Te uSamuwel là nkpaktak oIsarila pa, <<N gwong achwang chit ká nkpaktak iyam va ó là á mi, kang n na uponzhi á wó chit pa á nəm ká wó.

² Nyangmata te, na ó yà ká uponzhi, uwa unəm uga mpyal wó. Mmami te, n gbák chit, kang izwál fa á mi chit, nnyi te, ovan mi onunggwan oma yà nzəng ká wó. M b̄an nl̄əp mpyal a wó, ya na ka n yà uyenzam á ba chu n̄da va ta.

³ Mmami na ta, ó nyám ká iyam va á mi n nəm b̄ang ka mpyal aYawe ká ugargargargar. ÌNa ada n vyat yà? AZhaki áda n vyat yà? Uda n kar na yà? Uda m mwar na yà? N kam iyam ka atak áda pa na n kar nnandər ká yà? A yà pa n nəm iyam iro nəm ka ashe oga iyam va ta te, mi mwa anunung.>>

⁴ Oza na aman pa, <<U m mwar yi ka_t, ka_t te u kar yi ka_t. U kam iyam iro ká unəm uro pa na ú kar nnandər ká ka_t.>>

⁵ Te uSamuwel là ôzạ pa, << UYawe uwa kạ ñya wó, kang ugargargargar uwa kạ ñya wó nda va ta kpa, pa ó ya iyam iro kạ awo mi kat.>>

Kang oza là pa, <<Uza uwa kạ ñya.>>

⁶ Te uSamuwel là ônəm pa, <<UYawe uwa yak uMusa kạ uHaruna kang à fa kạ okəka wó kạ ashe mbin aMasar.

⁷ Nyangmata te, ó tong pa kwak, mmami kạ ngga í rəng kạ a wó kạ mpyal aYawe, oga nnap-nənən ngga nkam ishi va uYawe nəm kakul wó kạ okəka wó á.

⁸ <<Awalang va uYakup wa kạ aMasar te, oza yar ayəng ũYawe kakul nkam ishi. Kang uYawe re nre kạ uMusa kạ uHaruna, ova fa kạ okəka wó kạ ashe aMasar, kang á nak oza təm kạ mbin va ta.

⁹ Ñnyi te, oza kong kạ uYawe, Inan oza. Kang uYawe yap kạ oza kạ ashe awo aSisəra, unəm uga mpyal oshozha oga aHazor, kang kạ ashe awo oFilisti, kạ uponzhi uga aMowap, ova lung oza.

¹⁰ <<Te oza yəng ũYawe kang à là pa, <Í nəm nnap-mbángbạng chit, kakul í re ngwop uYawe chit, í wop oga aBaal kạ oga aAshtoret. Ñnyi te, ñyangmata, kam ishi yi kạ ashe awo okpa ikum yi, te í le í wop bu.>

¹¹ Te uYawe re nre kạ uJerup-Baal, kạ uBarak, kạ uJepta, kạ uSamuwel, kang uza kam ishi wó kạ ashe awo okpa ikum wó kạ nza ngbak nggo, kang ó təm kạ ikánkáng.

¹² <<Ñnyi te, awalang va ó ya uNahash uponzhi oAmmon kạ mba kạ apal wó, te ó là á mi pa, <Pa kat, í dom uponzhi pa á nəm iponzhi kạ apal yi,>

káp ká nva pa, uYawe, Inan wó uwa uponzhi wó á.

¹³ Ñyangmata, ó dər uponzhi va ó yak, uva ó bəp pa mmá na wó, te uYawe na á wó chit.

¹⁴ A yà pa ó nəm ayər aYawe, ó wop na, ó kpak nnap-nnəm á na, ó yáng nkpak nnap-mpakpakpakpak kat, kang a yà pa mmawó ká uponzhi va i nəm ká wó, ó le ó yar nvəng aYawe, Inan wó, te ó təm ká ikánkáng.

¹⁵ Ñnyi te, a yà pa ó kpak nnap-nnəm ũYawe kat, kang a yà pa ó fa iyamkak ka apal oga nnap-mpakpakpakpak, te uza i nyám ntàn á wó wa nva uza ka nyám òkəka wó á.

¹⁶ <<Ñyangmata te, ó tong pa kwak, na ó ya iyam ichumchum va uYawe kə ngga nnənəm kə mpyal wó.

¹⁷ Ñyangmata, awalang aga nkpám ibəshi kat dō? Mi ngga nfar ũYawe pa, á re nre ká ìvər ká ìgbarman. Te ó nyi iyam inga va ó nəm kə mpyal aYawe, nva ó bəp pa mmá na uponzhi a wó á.>>

¹⁸ Te uSamuwel far ũYawe, kang uYawe re nre ká ìvər ká ìgbarman n̄da nva ta. Kang nkpektak onəm tong nəm ayər aYawe ká uSamuwel.

¹⁹ Te oza là ũSamuwel pa, <<Far ũYawe, Inan bu kakul yi, le kang í kú kat. Í nəm nnap-mbángbàng á na chit pa makmak, kang ñyangmata, í nəm á na chit kàdī ka atak mbəp uponzhi.>>

²⁰ USamuwel là onəm pa, <<Kang ayər a nəm wó kat. Káp ká nva pa ó nəm nnap-mbángbàng chit, ka nna te, kang ó gəbən ó re uYawe kat. Kakul nva ta te, ó wop uYawe ká nkpektak ìgwak wó.

²¹ Kang ó gaḃaṇ ó wop ichər iyam ilakchilakchi kaṭ. Oza ya ká nkamshi kaṭ, le kang oza i fa ká wó, kaḱul oza iyam ilakchilakchi.

²² Kaḱul aḁin aYawe achumchum te, uza i ya ká ñyang ká onəm wò kaṭ. Kaḱul uYawe uwa ya ma pa ô yak wó, ó ya onəm wò.

²³ Mmami nnyi te, mi ya ká nnəm nnap-mbángbang uYawe ka atak nre nfar afar kaḱul wó kaṭ, kang mi dyang asaḷ anənaṇ a wó aga nnəm nnandər.

²⁴ Nnyi te, ó nəm ayər aYawe, ó wop na ká nnandər ká nkpektak igwak wó. Ó rəng oga iyam ichumchum va uza nəm kaḱul wó á.

²⁵ Kang a ya pa ó ga mpyal ká nnəm nnap-mbángbang, te mmawó ká uponzhi wó ó zhì.>>

13

USamuwel ran ká uShawulu

¹ UShawulu ri iponzhi ya uwa ya ká izun isəm pa ishatḁing, kang uza nəm iponzhi ka apal oIsarila izun isəm pa inəḁing aman pa parəm.

² UShawulu yak onungwan ikalong pa ishatḁing ka ashe oIsarila. Uza nak ikalong pa iparəm nzəng ká na ka aMikmat ká mbin aḁuktum aga aBetel, kang ikalong pa izəng nzəng ká uJonatan ka aGibeya ka mbin aBenjamin. Te uza re aḃo onungwan le nzhi oza.

³ UJonatan ru idonkong oshozha oFilisti ká ikum ka apak oza ka aGeba, kang oFilisti fe nnap va ta. Te uShawulu nak mmá bur agbəshi ka ashe nkpektak mbin oIsarila, kang à là pa, <<Re oHiburu á fe.>>

⁴ Te nkpaktak oIsarila fe nnap va ta pa, <<UShawulu ru idonkong oshozha oFilisti chit ká ikum, kang ñyangmata te, oIsarila sat onəm oga ajan chit ka mpyal oFilisti.>> Te mmá wor onəm but pa á gwang uShawulu ka aGilgal.

⁵ OFilisti but pa na ó lung oIsarila, ká oga akeke ipəri ikalong isəm pa ishatding, ká onəm oga nkwak ipəri ikalong pa ikpadíng, ká oshozha yél yà ká nkung kat. Oza ga ra apak ka aMikmat ka asal nfa alum aBet Aven.*

⁶ Awalang va oIsarila ya pa ikum sur chit, kang okpa ikum ká nlung oza pa gənggəng, te oza bwam ka ashe oga agbak, ká ipəpa, ká ishimshe ipang, ká oga ache, kang ká oga ache ndəng nkapkap.

⁷ Oro ka ashe oza pang awang aUrdun, ga mbin aGat ká aGileyat.

Ñnyi te, uShawulu tal ka aGilgal, kang nkpaktak onəm va ká na ka ntán ká ayər.

⁸ Uza lok ka aGilgal nra pa nfangshat pa ô gwang ká uSamuwel, wa nva uSamuwel ka là á na, ñnyi te, uSamuwel ba kat, kang onəm aShawulu bən nlyangshin.

⁹ Te uShawulu là pa, <<Mmá ba ká iyam inana iga nshì pa dwot, ká iga ntəm ikánkáng á mi.>> Kang uShawulu yichi nləfər ngga nshì.

¹⁰ UShawulu ká ngbal ká ñyichi iyam inana iga nshì va ta byet, te uSamuwel ba chu, kang uShawulu fa pa ô gwang na, ô re anung á na.

¹¹ Te uSamuwel bəp na pa, <<Iza u nəm ta yà?>>

* **13:5 13.5** aBet Aven Adin aBetel akak.

UShawulu na aman pa, <<N ya onungwan kà nlyangshin, kang nna ka u ba chit kat, ka awalang va u nak á, kang oFilisti oma but ka aMikmat.

¹² Te n rəng pa, <OFilisti iga nru mi ká ikum ñyangmata ka aGilgal, kang nna ka n chal uYawe chit kakul nkamshi kat.> Te n ya məma pa n yichi nləfər.>>

¹³ USamuwel là pa, <<U nəm mpərək. U kpak nnap-nlà aYawe, Inan bu nva uza na a bu kat. Ká yà pa u kpəkpak te, uYawe ká pak akum iponzhi bu ka apal oIsarila mbyet.

¹⁴ Te ñyangmata akum iponzhi bu i təm mbyet lap kat, kakul uYawe yak unəm chit uva dom igugwak. Uza kyer na chit pa á yà unəm uga mpyal onəm wò, kakul u kpak nnap-mpakpak aYawe kat.>>

¹⁵ Te uSamuwel wong re aGilgal ga aGibeya kà mbin aBenjamin. Kang uShawulu kung abo oshozha va nzəng ká na te, uza ya igbəl pa ikpəding.

OIsarila yà ká iyam ikum kat

¹⁶ UShawulu ká uyen wò, uJonatan ká oshozha va nzəng ká oza ka yà ka ntəm ka aGeba ka ashe mbin aBenjamin, ñnyi te, oFilisti ra apak oza ka aMikmat.

¹⁷ Oshozha oFilisti fa ka ashe apak, kap idonkong pa ishatding. İdonkong iga izəng ga asal mpal aOfəra ka ashe mbin aShuwal,

¹⁸ İdonkong iga iparəm ga asal aBet Horon, kang idonkong iga ishatding ga asal isu aswari va dər asal mbandam aZeboyim ava dər ashe nzam.

¹⁹ Onəm oga nla ala yà ka ashe mbin oIsarila kat, kakul oFilisti là pa <<Kang oHiburu a la oga ndokchi ká oga abár kakul ishi oza kat.>>

²⁰ A nak te, nkpaktak oIsarila i ga atak onəm oga nla ala oFilisti kakul ntan anung oga ashan, adyèr, ikù, ká ika oza.

²¹ Amwa kakul ntan anung ashan ina kat te adyèr te, uparəm ka apal ashatding ashekel, kang kakul ikù kat te iyam iga mbak ina oza te, uzəng ka apal ashatding ashekel.

²² Nda va ikum wong te, mmá ya unəm uro ka ashe oIsarila ká ndokchi kat te, ká abár kat, uShawulu ká uJonatan, oma ká byet.

UJonatan ru oFilisti ká ikum

²³ Te oFilisti re nre ká idonkong oshozha pa á pängchí asal aga ntar aMikmat.

14

¹ Nda nro te, uJonatan uya aShawulu là ûkpari wò uga yar iyam ikukum pa, <<Ba, í päng mbandam í ga apak oFilisti.>> Nnyi te, uza là ûpo wò kat.

² UShawulu ká onungwan wò igbal pa ikpadding oma ká nra apak ká nkur aGibiya ka avəng ikun ikúmkúm ka aMigron.

³ Ka ashe onungwan aShawulu te, uAhija unəm uga mpyal awop uwa yà ka ashe oza, uva pa ilukwan ikwoksok. UAhija uya aAhitup, ugənanğ alkabot, uya aFinehas, uka aEli, unəm uga mpyal awop ka aShilo. UNəm uro yà nyi pa uJonatan re ashe oIsarila chit kat.

⁴ Asa_l va uJonatan dom n wòl kà kang o ga atak apa_k oFilisti te, kà ishimshe abam pa_l parəm ava unəm uro i chu nkyen kà oga ngba_k oza_l ka_t. Abam aro mí wór pa_l aBozet, kang azəngtəng mí wór pa_l aSene.

⁵ Aro ka_l asa_l mpal a dər aMikmat, kang aro ka_l asa_l nkwandal a dər aGeba.

⁶ UJonatan là ûnəm uga ñyar iyam ikum á na pa, <<Ba, í pa_{ng} atak apa_k onəm oga ache amulur va ta. Mwote, uYawe a na igwan a yi nggo. Iyam iro yà i gəl uYawe kà nna igwan ka_l atak onəm ikum pa_l kyák ka_t te pa_l đap ka_t.>>

⁷ Te unəm uga ñyar iyam ikum á na là pa, <<Nəm iyam va u ya məma á, nna n yà nzəng ká bu ka ashe iyam va u dom nnənəm.>>

⁸ UJonatan là á na pa, <<Ba na í pa_{ng} na oza_l á ya yi.

⁹ A yà pa_l oza_l là á yi pa_l í tong ka_l atak va mmayi kà, kang ô ba ô ya yi te, í tong í yà ká ngga atak oza_l ka_t.

¹⁰ Ñnyi te, a yà pa_l oza_l là pa_l ì ba atak oza_l te, í kyen í ga. Nna ta ì nyám pa_l uYawe i ga nkamshi yi, í nəm igwan ká oza_l.>>

¹¹ Nna chit te, mparəm oza_l fa nyám ishi oza_l ôFilisti. OFilisti là pa, <<Dər, oHiburu ka_l nnár i fa ka ashe ache atak va oza_l bwam kà.>>

¹² Te onəm ka_l ashe apa_k wór uJonatan ká unəm uga ñyar iyam ikum á na pa, <<Ó ba, na í đyang ntan a wó.>>

UJonatan là ûnəm uga ñyar iyam ikum wò pa, <<Kyen, yar nva_{ng} mi, kakul uYawe na oza_l chit ka ashe awo oIsarila.>>

13 Te uJonatan kyen abam va ta i nár ká irəng ká awo, ká unəm uga ñyar iyam ikum á na. Te oFilisti tak ká mpyal aJonatan kang unəm uga ñyar iyam ikum á na, yar nvəvəng gbáng oza.

14 Onunggwan va uJonatan ká unəm uga ñyar iyam ikum á na gbáng nggəshi te, á chu isəm pa iparəm chu ka ashe agbagba va á chu nshang iram ina chu ilum pa izəng.

OIsarila nəm igwan ká oFilisti

15 Te ayər nəm nkpaktak oshozha, ovəngva ka ashe apak ká ovəngva ka agbagba ikum, káp ká oshozha oga mpángchí atak ká oga nlép mpyal ikum, kang mbin tan. Inan uwa nak ayər va ta.

16 Oshozha oga mpángchí atak aShawulu ka aGibeya aga mbin aBenjamin, ya oshozha oFilisti zwar kang ka nlyangshin.

17 Te uShawulu là ônunggwan wò pa, <<Ó kung oshozha na ó nyi unəm va yà kat.>> Nvəngva oza kung te, oza ya uJonatan ká unəm uga ñyar iyam ikum á na yà kat.

18 UShawulu là ûAhija pa, <<Ba ka akwati aga nsar nnap-nlà Inan ka ta.>> Ka awalang va ta te, akwati aga nsar nnap-nlà Inan nna ka yà nzəng ká oIsarila.

19 Nva uShawulu ka yà ka nlà nnap ká unəm uga mpyal awop te, nzwar ka ngga mpyal ka ashe apak oFilisti. Te uShawulu là ûnəm uga mpyal awop pa, <<Kang á đak bu kat, í ga.>>

20 Te uShawulu ká nkpaktak onunggwan wò but kang à ga atak ikum. Kang oza ga ya oFilisti zwar chit pa makmak, le í gbáng owan oza ká ndokchi.

21 OHiburu va_ka_ ya_ nza_nga_ ka_ oFilisti kang a ga nza_nga_ ka_ oza_ka_ apa_k oza_ te, a_ le ga atak oIsarila va_ka_ ya_ nza_nga_ ka_ aShawulu ka_ uJonatan a_.

22 Awalang va_ nkpaktak oIsarila va_ka_ bwam ka_ ashe aduktum aga mbin aEfrayim fe pa_ oFilisti ka_ ncha_nga_ te, oza_ fa_ gwang bak oza_ka_ ikum kpa.

23 Te uYawe kam ishi oIsarila nda va_ ta, kang onəm lung ikum ga watar aBet-Aven.

UJonatan ri mmal irizhe

24 Nyangmata_ te, oshozha oIsarila belak byet nda va_ ta, kakul uShawulu ka_ yar nsong anung chit pa, <<Unəm va_ a ri iyam-nri kang arurong i nəm te, re Inan a_ vyap na, ya mi pyat nnap ka_ apal oFilisti kang.>> Te unəm uro ya_ ri iyam iro nda va_ ta kat.

25 Nkpaktak oshozha tang ashe ikun te, oza_ ya mmal irizhe ka_ mbin.

26 Awalang va_ oza_ tang ashe ikun te, oza_ ya mmal irizhe ka_ nwàr, nnyi te, unəm uro ya_ dok ka_ ifang ga ka_ka_ anung wo_ kat. Kakul oza_ nəm a_ yer nsong anung va.

27 Nnyi te, uJonatan uwa ka_ fe chit pa_ upo wo_ song anung chit kat, te uza_ pa_ ishi idari va_ ka_ awuwo ka_ ashe mmal irizhe. Te uza_ nak ka_ awo wo_ tam, kang uza_ ya ikam.

28 Te uro ka_ ashe oshozha la_ uJonatan pa, <<Upo bu ka_ song anung oshozha chit kekam pa, <Unəm va_ i ri iyam-nri nda ta_ te, i vyap.> Nna nak te, onungwan belak a_ ya_ ka_ ikam kat.>>

29 Te uJonatan la_ pa, <<Upo mi ba_ ka_ ndaktak chit ka_ ashe mbin. Der asal awu va_ n ya ikam ka_, nvengva_ n dok irizhe va_ ta_ pa_ dap a_.

³⁰ Ka yà pà mmá ká məman ôshozha pà á ri iyam-nri va oza wur ka atak okpa ikum oza te, mmá ka gbáng oFilisti ka ji va ta ji kat dō?>>

³¹ Nda va ta, nvangva oIsarila bàn gbáng oFilisti ka aMikmat ga chu aAijalon te, oza bəlak pà gənggəng.

³² Oza gbang izər ka ngwur iyam iga ngwur ka atak ikum, itam, ina, ká ivan ina, kang oza pà oza ri ká nchəchər.

³³ Tə unəm uro là ũShawulu pà, <<Dər, onung-gwan kə nəm nnap-mbángbáng ũYawe ka atak nri izhé va kə nchər.>>

ŨShawulu là pà, <<Ó vyap nnap-mpakpak chit. Ó bəndəng inang ipang á mi kə ta.>>

³⁴ Tə uza là pà, <<Ó ga ó là ōnung-gwan pà, <Udanggo á ba ká ina wò ká itam wò á mi, kang ó pà oza kə ta ó ri. Kang ó nəm mpat ũYawe ka atak nri izhé kə nchəchər kat.> >>

Tə udanggo ba ká ina wò ká izwam va ta kang à pà kə ta.

³⁵ Tə ũShawulu me atak nshi iyam awop ũYawe, nna ta, atak awop aga nggəshi va uza me.

³⁶ Tə ũShawulu là pà, <<Í fəng í ga na í bak oFilisti ká izwam va ta, í wur iyam oza kang atak i tan, kang í gbáng oza, í re unəm uro kə iriri kat.>>

Tə oza là pà, <<Nəm iyam va u ya məmal ká bu.>>

Nnyi te, unəm uga mpyal awop là pà, <<Re í bəp Inan kang.>>

³⁷ Tə ũShawulu bəp Inan pà, <<N ru oFilisti va ta dō? Bu na oza na kə ashe awo oIsarila dō?>> Nnyi te, Inan na amən a na n̄da va ta kat.

38 Kākul nva ta te, uShawulu là pa, <<Ó ba ka ta, nkpaktak onəm oga mpyal oshozha, re í mwo nnap-mbángbàng va mmá nəm chit nda va ta.

39 Wa nva uYawe uga nkamshi oIsarila wa ya te, n sòng anung ká adidin, kang a yà pa uyen mi uJonatan uwa nəm mpat va ta te, nkpak uza i kú.>>Nnyi te, ushozha uro yà na aman á na kat.

40 Te uShawulu là nkpaktak oIsarila pa, <<Ó tong ka ngbak pa nzəng, kang mmami ká uJonatan i tong ka ngbak nro.>>

Kang oza là á na pa, <<Nəm iyam va u ya məmal ká bu á.>>

41 Te uShawulu far uYawe, Inan oIsarila pa, <<Iza nak kang u na aman úzwál bu ká nda a ta kat yà? A yà pa mpat ká mmami kat te uyen mi uJonatan te, wa aman ká aUrim nnyi te, a yà pa onungwan oga aIsarila oma ká mpat te, wa aman ká aTumim.*>> Kang oza mang ayàk te, ayàk ru ká apal aJonatan ká uShawulu, kang onungwan va ta mmá ya oza ká mpat kat.

42 UShawulu là pa, <<Ó mang ayàk ká ishimshe mi ká uyen mi, uJonatan.>> Kang ayàk ga yar uJonatan.

43 Te uShawulu là uJonatan pa, <<Là á mi, iza u nəm yà?>>

Kang uJonatan là á na pa, << N dok mmál irizhe ká ishi idari mi kang n tám. Te nyangmata nkpak pa n kú.>>

44 UShawulu là pa, << Re uYawe á bək anung á mi pa gənggəng, a yà pa u kú kat á, aJonatan.>>

* 14:41 14.41 Dər aLev 8:8.

45 Ñnyi te, onunggwan va ta là ûShawulu pa, <<A mál pa uJonatan a kúkú á, uza va ba ká nnang nkamshi ôlsarila dò? Nva ta i yà ka nnəm kaṭ. Wa nva uYawe wa ya te, akpap ishishi aro pa zəng i ru ka mbin kaṭ, kakul Inan a kamshi á na kang uza nəm igwan va ta nda va ta.>> Te onunggwan va ta kam ishi aJonatan, kang mmá gbál na kaṭ.

46 Te uShawulu re mbàk oFilisti, kang oFilisti le nvaṅ ga mbin oza.

47 Nvaṅva uShawulu yà uponzhi oIsarila te, uza lung nkpaktak okpa ikum oza ka nza nggbak nggo, oMowap, ká oAmmon, ká oEdom, ká oponzhi oga aZobak, kang ká oFilisti. Kang atak va kpaktak uza ga ikum ka te, uza nəm igwan.

48 Uza lung ikum ká nkam ipaṅ, kang à nəm igwan ká oAmalek. Uza kam ishi oIsarila ka ashe awo onəm va ka wur iyaṁ oza ká ikum.

Onəm oga nzhi aShawulu

49 Ovan onunggwan áShawulu oma, uJonatan, ká uYishwi, ká uMalkishuwa. Kang aḍin ovəvan ochar, uMerap uwa uga nggəshi, ká uMikal uwa ubwakan.

50 Aḍin achichar pa uAhinowam, uyen uchar aAhima'az. Aḍin ánəm uga mpyal oshozha aShawulu pa uAbner, uya aNer, kang uNer nnyi te, ukyan aShawulu.

51 Upo aShawulu uKish ká upo aAbner uNer, oma ovan aAbiyel onunggwan.

52 UShawulu nəm ikum pa gənggəng ká oFilisti ka ashe nkpaktak nra iponzhiponzhi. Kang ununggwan va uShawulu ya kəkam, kaṭ te ká nkam igwak te, uza i ba ká na ka ashe oshozha wò.

15

UYawe yang uShawulu ká iponzhi

¹ Te uSamuwel là ûShawulu pa, <<UYawe re mi pa n gor bu uponzhi ka apal onəm wò oIsarila. Nyangmata te, gong achwang kà nre va ka atak aYawe.

² Iyam va ta uYawe uGa ngGatək là, <Mi ga nnyám ntàn oAmalek kakul oza ru oIsarila ká ikum ka awalang va oza fa ka ashe mbin aMasar.

³ Nyangmata te, ga na u ru akum oAmalek ká ikum kang bu zhì nkpaktak iyam va iji oza. Kang wa re oza kat, gbáng onungwan, ká ochar, ká ovan, ká ovan obak, ká ina, ká itam, ká oga alakəmi, kang ká oga azhaki.> >>

⁴ Te uShawulu but oshozha wò ka aTəleyim, kang a kung oza te, uza ya ikalong igbal pa iparəm ka aboshi akum aIsarila, kang ikalong pa igbapchi ka aYahudi.

⁵ Te uShawulu ga itong oAmalek ga ra anyimnyal ka ashe abandam.

⁶ Te uza là ôKenî pa, <<Ó fa, ó re oAmalek kang mmá gbáng wó nzəng ká oza kat, kakul ka ó nyám ikin ngkpaktak oIsarila, ka awalang va oza fa ka aMasar á.>> Te oKenî fa re oAmalek.

⁷ Te uShawulu gbáng oAmalek á bàn ka aHavila ga chu aShur, dat ká aswari asal nfa alum ngga aMasar.

⁸ Uza kpán uAgak uponzhi uga aAmalek ká irirì, kang uza zhì aboshi onənəm pa kpaktak ká ndokchi.

⁹ Nnyi te, uShawulu ká oshozha re uAgak ká irirì, ká itam inənan, ká ina, ká ivan itam ká ivan

ina inənən, ká nkpaktak iyam və byen ká oza, oga iyam və ta ri igwak ôza, oza zhì oza kat. Kang nkpaktak ivəngva byen ká oza kat, te oza zhì oza pa chatchat.

¹⁰ Te uYawe là ûSamuwel pa,

¹¹ <<Mmami ká nlak igwak nva n nak uShawulu yà uponzhi á, kakul uza gabañ asəm á mi chit, kang uza yang ka nkpak nnap-mpakpak mi chit.>> USamuwel fe iyam və ta te, igwak lak na pa gənggəng kang uza chal uYawe ka ashe nkpaktak izwam və ta.

¹² İpin fa kpaç ká ibotak te, uSamuwel wong ga pa na ô ya uShawulu. Te mmá là á na pa, <<UShawulu ga aKarmel chit. Uza me iyam kakul nrəng ká adin wò ka ta, kang uza ga aGilgal chit.>>

¹³ Awalang və uSamuwel ga ya na te, uShawulu là á na pa, <<Re uYawe á pañ bu, n yəl kà nnap-nlà aYawe chit.>>

¹⁴ Nnyi te, uSamuwel là pa, <<A ya pa na te, iza mmami kà nfife yà? Ayəng itam ká ina kat dō?>>

¹⁵ UShawulu na aman pa, <<OShozha ba ká oza ka atak oAmalek, oza yak itam inənən ká ina kakul na mmá yichi nləfər ûYawe, Inan bu ká, Nnyi te, í zhì nkpaktak iza nggo.>>

¹⁶ Te uSamuwel là ûShawulu pa, <<Mañ, na n là a bu iyam və uYawe là á mi ká izwam ká nlam.>> UShawulu là pa, <<Là á mi.>>

¹⁷ Te uSamuwel là pa, <<Káp ká nva u ya ishi bu iyam iro kat, ka nna te, u nyang unəm uga mpyal oga akum oIsarila kat dō? UYawe gor bu chit uponzhi oIsarila.

18 Kang uza re bu pa, <Ga bu zhì onəm obángbàng va ta, oAmalek pa kpaktak, lung oza na u gbàng oza pa chatchat.>

19 Iza nak kang u kpak nnap-nlà aYawe kat yà? Sang kang u wur iyam iga ngwur ka atak ikum kang u nəm iyam ibángbàng wanta kà mpyal aYawe yà?>>

20 Nnyi te, uShawulu là pa, <<N kpak nnap-nlà aYawe kpak, n nəm nre wa nva uza re mi á. N zhì nkpaktak oAmalek kang m ba ká uAgak uponzhi oza.

21 Oshozha wur itam ká ina inənan ka atak ikum iva mal pa mmá zhì kakul pa ó yichì nləfər ũYawe Inan bu ká, ka aGilgal.>>

22 Te uSamuwel na aman pa,
<<Iza uYawe dom ji yà?

Iyam inana bu iga nshì ká nləfər kat te nkpak nnap-nlà aYawe dò?

Nkpak nnap-nlà byen ji nna nləfər ji,
nfe nnap byen ji mpyip inagam ji.

23 Nfa iyamkak ká uYawe á sat wa nnap-mbángbàng ivak.

Kang nkak ishi te, á bəng wa ngwop ichər.
Kakul u yang ká nnap-mpakpak aYawe chit,
te wa nnà ta uza yang bu chit ká nyà uponzhi.>>

24 Te uShawulu là ũSamuwel pa, <<N nəm nnap-mbángbàng chit. N kpak nnap-mpakpak aYawe kat, kang n kpak nnap-nlà bu kat kpa, kakul n nəm ayər oshozha, nna nak te, n nəm iyam va oza dom.

25 Nyangmata n chal bu, yar nnap-mbángbàng á mi, na u le nzəng ká mi, na n wop uYawe.>>

26 Te uSamuwel là pa, <<Mi ya ka nle nzəng ká bu kat. Kakul u yang nkpak nnap-nlà aYawe, te uYawe yang bu chit ká nyà uponzhi oIsarila.>>

27 Awalang va uSamuwel gaḃan pa na ô ga te, uShawulu kpán arwangchwang ilukwanlukwan te, ilukwan va ta kakchi.

28 USamuwel là á na pa, <<Wa nva u kakchi ilukwan mi te, wa nnà ta uYawe kakchi iponzhi oIsarila chit ka atak bu nda ta, kang uza na ûnem uro paḃi, uva á byen ji bu ji.

29 Uza va Ìzhàn oIsarila i nap akwam kat, uza i gaḃan nnap-nlà wò kat, kakul uza unəmləbər kang i gaḃan nnap-nlà wò kat.>>

30 Te uShawulu na aman pa, <<N nəm nnap-mbángbàng chit. Ka nna kpa te, n chal bu, wa man te, wa na ichumchum á mi ka mpyal onəm oga mpyal onəm mi ká oIsarila, le nzəng ká mi na n wop uYawe, Inan bu.>>

31 USamuwel gaḃan, a le ga nzəng ká na, kang uShawulu wop uYawe.

32 Te uSamuwel là pa, <<Ba ká uAgak uPonzhi oAmalek á mi.>>

Te uAgak ba ka mpipyal ka ashe ìkan, uza rəng pa, <<Nnandər ikú va ka apal mi te á lyam chit.>>

33 Ìnyi te, uSamuwel là pa, <<Wa va ndokchi bu nak ochar pa makmak lang ovan oza te, unang bu i ga nlang uyen wò kpa.>> Te uSamuwel kyen uAgak ka ndokchi pa nyimənnymən ká mpyal aYawe ka aGilgal.

34 Te uSamuwel le aRama, ìnyi te, uShawulu le nzhi wò ka aGibeya aShawulu.

35 Te uSamuwel ga atak uShawulu lap kat ga chu nra va uSamuwel kú ká, ònyi te, uSamuwel yà ká adór ká apal aShawulu pa makmak. Kang uYawe ká nlak igwak kakul nva uza nak uShawulu yà uponzhi oIsarila á.

16

USamuwel gor uDawuda pa a yà uponzhi

1 UYawe là ûSamuwel pa, <<Ázəmo kang bu re nnəm adór ká apal ishi aShawulu yà? N yang na chit ká òyà uponzhi ká apal oIsarila. Yél agbəshi bu ká mmì mpyet na u ga aBet-Lehem, mmami ká nre bu ká atak aJese, kakul n yak uyien uro chit pa a yà uponzhi.>>

2 Ònyi te, uSamuwel là pa, <<Mi nəm sang kang mi nəm iyam va ta yà? A yà pa uShawulu i fe te, i gbál mi.>>

Te uYawe là pa, <<Yar iya ina ìchar ká awo, te là pa, <M ba pa n yichi nləfər ûYawe.>

3 Chal uJese ká nləfər va ta, kang mi nyám iyam va a bu pa u nəm. Bu gor uro va mi nyám á bu.>>

4 USamuwel nəm wa nva uYawe là á na. Awalang va uza chu aBet-Lehem te, onəngbak oga aBet-Lehem fa gwang na ká ayər. Oza bəp pa, <<U ba amwang na lyát dò?>>

5 USamuwel man pa, <<M ba ikánkáng pa sham. M ba pa n yichi nləfər ûYawe. Ó gár ishi wó na ó ba nzəng ká mi ká atak nləfər.>> Te uSamuwel gar uJese ká ovəvan onungwan, kang uza chal oza kpa ká nləfər va ta.

⁶ Awalang va oza chu chit kang uSamuwel dər uEliyap uya aJese te, uza rəng pa, <<Nkpak uwa uYawe gor.>>

⁷ Nnyi te, uYawe là ûSamuwel pa, <<Kang wa dər ka acham izər, kat te imak kat, kakul n yang na chit. UYawe i dər iyam wa nva unəmləbər i dər kat. Onəmləbər i dər ka acham izər, nnyi te, uYawe i dər igwak.>>

⁸ Te uJese là ūyen wò uAbinadap pa uza a lyam ka mpyal aSamuwel, nnyi te, uSamuwel là pa, <<UYawe yak uva ta kat na kpa.>>

⁹ Te uJese le nak uShamma lyam ka mpyal aSamuwel, te uSamuwel là pa, <<UYawe yak na kat na kpa.>>

¹⁰ UJese nak ovan wò onunggwan pa ofangshat, lyam ka mpyal aSamuwel, nnyi te, uSamuwel là a na pa, <<UYawe yak uro ka ashe oza kat.>>

¹¹ Te uza bəp uJese pa, <<Ovan bu onunggwan oma ta byet dō?>>

UJese na aman pa, <<Ubwakan oza uwa ya ka atak nkpək iyamkang ka ashe nzam.>>

Te uSamuwel là á na pa, <<Re nre ka na, í ya ka ntəm kat ya uza i ba kang.>>

¹² Te uJese re nre mmá ba ká na. Uza uyenzam uga mbyen ndər uva ká ikánkáng.

Te uYawe là pa, <<Wóng, uwa ta gor na.>>

¹³ USamuwel yar agbəshi mmì zuk uDawuda ká ishi kang uza gor na ka ka mpyal ogənanggənang. Ban ka nda va ta te, aRuhu aYawe vāng ká ikam ka apal ishi aDawuda. Nna chit te uSamuwel le aRama dak.

UDawuda nəm inok kà nzhi aShawulu

¹⁴ ARuhu aYawe re uShawulu, kang uYawe re nre ka aruhu abángbàng nyán ká na.

¹⁵ Oro ka ashe okpari aShawulu là á na pa, <<Dər, aruhu abángbàng vàng chit ka atak Inan kà nyán ká bu.

¹⁶ Re, anəm uga nzhi yi, í mwo unəm uga ñnyi nném abwa, na awalang va aruhu abángbàng ka atak Inan a vàng ka apal bu te, uza i ném abwa va ta na nnap nəm bu á ba kàdi.>>

¹⁷ Te uShawulu là ôkpari wò pa, <<Ó ram unəm va nyi nném abwa byet, na ó ba ká na á mi.>>

¹⁸ Uro ka ashe okparikpari na aman pa, << Uya aJese unəm uga aBet-Lehem uro wa yà nyi nném abwa byet. Uza kam igwak, kang i lung ikum byet. Uza ká aghan nnap-nlà kpa, kang uza uyenẓam uga mbyen ndər. UYawe uwa yà nzəng ká na.>>

¹⁹ Te uShawulu re onəm oga nre ka atak aJese pa, <<Re nre á mi ká uyen bu uDawuda, uyen uga nkpak ibəl bu.>>

²⁰ Te uJese re nre ká uDawuda nzəng ká nzəngkəng ka apal azhaki, ká abàng ndəng ibàngbàng ká iya ibəl ga ũShawulu.

²¹ UDawuda ba atak aShawulu kang a bən nnəm inok á na. UShawulu man ká uDawuda byet, kang uDawuda sat uzəngtəng ka ashe onəm oga ñyar iyam ikukum.

²² Te uShawulu re nre ũJese pa, << Re uDawuda á təm a nəm inok á mi, kakul m man ká na pa gənggəng.>>

²³ Awalang va aruhu abángbàng ka atak Inan i vàng ka apal ishi aShawulu te, uDawuda i

nəm abwa wò. Te aruhu abángbàng va ta i re uShawulu kang nnap-nnənəm i le i ba.

17

UDawuda ká uGoliyat

¹ Te oFilisti but oshozha oza kakul ikum, ka aSoko ka aYahudi. Oza ra apak ka aEfes Dammim, ka ishimshe aSoko ká aAzeka.

² UShawulu ká oIsarila but kang a ra apak ka mbandam aEla, oza gbar izər kakul ikum ká oFilisti.

³ OFilisti tong ka aduktum aro kang oIsarila tong ka aro, ká mbandam ká ishimshe oza.

⁴ Te uGoliyat uponzhi ikum oFilisti unəm uga itong aGat, fa tal ká ishimshe oFilisti ká oIsarila, i rurup ji ashar pa fangzəngtəng ji.

⁵ Uza pa atagya aga acham arəzang ká ilukwan iga acham arəzang, idədek ikalong pa itukun iga ashekel.

⁶ Uza mwak acham arəzang ka ashar wò, kang uza gantal abár akəlapkəlap aga acham arəzang ka agar.

⁷ Azar abəbar wa idari iga nkap atani, kang ishi abəbar, idədek i nəm ashekel igba pa ikpađing nəm. Unəm uga nyar nggwənggwəng ikukum i ləp mpyal a na.

⁸ UGoliyat fa sat ká mpyal oshozha oIsarila kang à ləp achu pa, <<Ó tong iza yà? Ó ba ikum ka dō? Mmami unəm oFilisti, kang mmawó okpari aShawulu ka dō? Ó yak unəm uro á ba ka ashe mbandam na á lung mi kəta.

⁹ A yà pà_ uza_ á lung mi kang a gbál mi te, oFilisti i yà ozwal wó, ñnyi te, a yà pà_ ma ji nkəkəm kang n gbál na te, ó yà ozwal yi.>>

¹⁰ Te unəm oFilisti là pà, <<M bak oshozha oIsarila n̄da va_ ta. Ó re unəm wó uro á ba ná í lung owan yi.>>

¹¹ Ká nfe nnap-nl̄a aFilisti va_ ta te, ayər nəm uShawulu ká nkpaktak oshozha oIsarila kang oza_ tán pà_ gənggəng.

¹² Ñyangmata_ te, uDawuda uya aJese, unəm uga aEfərata kà aBet-Lehem kà_ ashe mbin aYahudi. UJese kà_ ovan onungwan pà_ onanne kang kà_ awalang iponzhi aShawulu te, uza_ gbák chit.

¹³ Ovan aJese onəmgbak pà_ oshatđing ga ikum chit ká uShawulu. Unəmgbak te, kà_ yà uEliya_ p uga uparəm uAbinadap, kang uga ushatđing uShamma.

¹⁴ UDawuda uwa uyen kà_ ashe nkpaktak ovan onungwan aJese. Onəmgbaknəmgbak oga oshatđing va_ ta yar nv̄əng aShawulu,

¹⁵ ñnyi te, uDawuda i wong i ga atak apak aShawulu kang i le i ga aBet-Lehem kakul nkpak iya_ nkang apo wò.

¹⁶ Nra isəm pà_ ineding uFilisti va_ ta kà_ nnəm inok mpyar oshozha oIsarila ipin ká_ arurong.

¹⁷ Nda nro te, uJese là ûDawuda pà, <<Yar ikur ifórfòr ikpáng iga mma iya_ ká_ nzəngkəng pà_ ngbapchi ga ogənan_ g bu pà_ kəlak kà_ apak.

¹⁸ Te yar mbyal ina nva mmá pək chit nək pà_ ngbapchi ga unəm uga mpyal oza_. Wa dər ikánkáng ogənan_ g bu kang bu ba ká_ iya_ iro a mi iva i nyám pà_ oma yà ká_ ikánkáng.

19 Ogənanɔŋ bu oma yà nzəng ká uShawulu ká oshozha oIsarila ka mbandam aEla kà nnəm ikum ká oFilisti.>>

20 Ipin fa kpak ká ibotak te, uDawuda wong re iyam nkang ka ashe awo anəm uga nkpak iyam nkang uro. Uza wur iyam va upupo uJese re na ka á. Uza ga chu apak ka awalang va oshozha oIsarila ka ngga agbagba ikum, kà nnəm achu ikum.

21 Oshozha oFilisti ká oIsarila fa agbagba ikum tong i dər owan oza.

22 Te uDawuda re iyam va uza ba ká ka atak anəm uga mpángchí iyam kang uza chər ga agbagba ikum re anung ogənanɔŋ wò.

23 Uza ka nlà nnap ka oza, ta byet te, uGoliyat unəm oFilisti ka aGat, fa ka ashe oshozha oFilisti, kang i là apir nnap-nlà wò ngga mpyar oza ka anung, te uDawuda fe.

24 Nkpaktak awalang va oshozha oIsarila ya na te, oza bən nchəng í le kakul ayər nəm oza byet.

25 Nyangmatə te, oIsarila i là pa, <<Ó ya agbar anəm va cho ya fa ta dō? Uza fa pa ô bak oIsarila. Uponzhi i ga nná idur imakmak ũnəm va i gbál na, uza i na uyen wò uchar uro á na i kam, kang onənəm te, oza imwa mbwai mbin kat.>>

26 Te uDawuda bəp onəm va dat ká na pa, <<Iza mí nəm unəm va i gbál uFilisti va ta kang i yar iwuswa va ta i le oIsarila yà? Uda uFilisti va ta unəm uga ache amulur, kang i bak oshozha Inan iga iriri yà?>>

27 Kang oshozha na aman á na wa nva mmá là á. Oza là pa, <<Iyam va ta amwa kakul anəm va i gbál na.>>

28 Awalang va uEliyap unəmgbàk aDawuda fe na kanlà nnap kaoshozha te, igwak lak na kana kang uzabəp na pa, <<Izau ba kakatayà? U re itam iga ndəp vauda kaashe nzam ya? N nyi bu ká nrup ishi ká nkak ishi nyi. U ba pana u dər nlung ikum.>>

29 UDawuda bəp pa, <<Nzampat n nəm chit ñyangmatayà? Mi là nnap-nlà lap kat dō?>>

30 Te uzare na gaban atak ashozha uro, kang uzabəp na wa nva uzaka bəp. Te oshozha vata na aman á na wa nva mmá kana á na á.

31 Iyam va uDawuda là te, oza ga là ûShawulu, kang uShawulu re nre pa mmá ba ká na.

32 UDawuda là ûShawulu pa, <<Kang ichəgwak á ləp unəm uro kauFilisti vata ta kat. Uzwal bu i ga i lung na.>>

33 UShawulu man ûDawuda pa, <<Bu nəm sang kang bu lung uFilisti vata ya? Mmabu uyen ubwakan, kang uza unungwan ikum ban ká ivanzəzam na byet.>>

34 Ñnyi te, uDawuda là ûShawulu pa, <<Uzwal bu i kpak iyam nkang apo wò. Awalang va ilir kat te abiya ba nkpan itam kaashe nggatək iyam nkang,

35 mi bək na, mi lap kang mi vyat itam va ta ka anunung. Awalang va i gaban ikum ká mi te, mi kpán na ka akpap kang mi nəm ka ikəkam ikú.

36 Uzwal bu gbal ilir ká abiya chit, mi ga nnəm uFilisti uga ache amulur va ta wanta na kpa, kakul nva uza bak oshozha Inan iga iriri chit.

37 UYawe va fa ká mi ka ashe awo ilir ká abiya va ta te, uwa i fa ká mi ka ashe awo aFilisti va ta.>>

UShawulu là ûDawuda pa, <<Ga mpyal ka, uYawe a ya nzəng ká bu.>>

³⁸ Te uShawulu mwak iyam ikum wò ûDawuda, uza pa atagya acham arəzang ká ilukwan acham á na.

³⁹ UDawuda mwak chit, te uza gal ndokchi uza đak pa ô chen ká te, a ma na kakul uwa mwak apir ilukwan va ta chit ka.

UDawuda là ûShawulu pa, <<Mi nyi nchen ká iyam va ta ka, kakul nna mwak apipir chit ka.>> Te uDawuda zəp iyam va ta le.

⁴⁰ Te uza yar idari wò ka awo, wur ipang pa itukun imálkanmalkan ka ashe awang, uza nak ka ashe azhal aga nkpak iyam nkang wò, ká nchwalak wò ka awo kang uza ga dát ká unəm oFilisti va ta.

⁴¹ Nnyi te, uFilisti va ta nzəng ká unəm uga nyar nggwangwang ikum á na ka mpyal, fa mba nggwang uDawuda.

⁴² Uza dər uDawuda te, uza ya na uwa yà uyen ubwakan uga mbyen dər, uva ká ikángkáng, te uza bak na.

⁴³ Uza là ûDawuda pa, <<Mmami iva kang bu ba ká mi ká idari dō?>> Kang uFilisti va ta vyap uDawuda ká adin inənan.

⁴⁴ Uza là pa, <<Ba ka, na n ná izhe bu inyil ká izhé iga anyin.>>

⁴⁵ UDawuda là ûFilisti va ta pa, <<U ba ká mi ka ndokchi, ká abár ká abár akəlapkəlap, nnyi te, m ba ká bu ka ashe adin aYawe uGa ngGatək, Inan oshozha oIsarila, uva u bak á.

⁴⁶ Nda va ta uYawe i na bu ka ashe awo mi, kang mi gba bu mi gəl ishi bu. Te nda va ta mi na

oga akúm oshozha oFilisti înyil ká izhé iga anyin, kang nkpaktak apambin i nyi pa, Inan i ya yà ka aIsarila.

⁴⁷ Nna chit te, nkpaktak nggatək va kạta i nyi pa uYawe i kamshi onəm wò ká abár kạt te ndokchi kạt. Ìkum iji àYawe, uza i na nkpaktak wó kạ ashe awo yi.>>

⁴⁸ UFilisti va ta səng ba dát pa na ú ru na te, uDawuda ghaṇ chər ga dát ká ngbak va oFilisti kạ, pa ô gwang na.

⁴⁹ Kang uDawuda pa awo kạ ashe azhal wò yar ipang kạ ashe azhal aga nkpak iyam nkang wò, uza nak kạ ashe nchwalak kang uza mang ləp uFilisti va ta ká isu. Ipang va ta tar kạ ashe ikpang ishishi, kang uGoliyat ru zəp kạ mbin.

⁵⁰ Te uDawuda nəm igwan kạ uFilisti va ta ká nchwalak ká ipang. Uza gbạl uFilisti va ta nzəng ká ndokchi kạ awuwo kạt.

⁵¹ Te uDawuda chər ga sat kạ apal ishishi. Uza tur ndokchi aFilisti va ta kạ ashe avakchivakchi. Nvangva uza gbạl na te, uza gəl ishi á na ká ndokchi va ta.

Awalang va oFilisti ya chit pa uponzhi ikum oza kú chit, te oza chəng le nvang.

⁵² Te oIsarila ká oYahuda bà achu aga igwan, kang oza bək oFilisti ga chu ká kạ anung asaḷ aGat, ká anung oga asaḷ aEkron. OFilisti va kú te, a tak kạ asaḷ á ga ngga aShayarayim á ga chu aGat ká aEkron.

⁵³ Awalang va oshozha oIsarila le kạ atak nwà oFilisti te, oza wur iyam iga nwur kạ atak ikum kạ ashe apak oFilisti.

⁵⁴ UDawuda yar ishi aFilisti va ta ba ka ka aUrushelima te, uza nak iyam ikum aGoliyat ka ashe aghal wò.

⁵⁵ Nva uShawulu ka ya uDawuda ka nfa ngga pa ô lung uFilisti te, a bəp uAbner unəm uga mpyal oshozhashozha pa, <<Uyen va ta uya ada ya?>>

Te uAbner là pa, <<Irirì aponzhi á təm mbyet, n nyi upupo ka?>>

⁵⁶ Uponzhi là uAbner pa, << Ga bəp, uda upupo ya?>>

⁵⁷ Nvangva uDawuda le chit ka atak ngbál uFilisti te, uAbner kam na ba ka uShawulu ya ishi aFilisti va ta na ka awo aDawuda.

⁵⁸ UShawulu bəp na pa, <<Ayen nza, mmabu uya ada ya?>>

Te uDawuda là pa, <<Mmami uya azwal bu uJese, unəm uga aBet-Lehem.>>

18

Ayər aShawulu ka apal aDawuda

¹ Ka nvangva uDawuda gbál ka nlà nnap chit ka uShawulu te, uJonatan, uya aShawulu dom uDawuda pa makmak, kang uJonatan man na wa nva uza man ishi wò á.

² A bən nda va ta te, uShawulu re uDawuda le nzhi lap ka, uza təm ka na.

³ Kang uJonatan yar nsar nnap-nlà ka uDawuda, kakul uza man na wa ishi wò.

⁴ UJonatan tur ilukwan wò uza na uDawuda, nzəng ka ilukwan ikukum, ka ndokchi, ka ijang, ka ngbat.

⁵ Atak va pa kpaktak uShawulu i re uDawuda pa uza a ga a nəm ikum te, uDawuda i nəm igwan ká. Te uShawulu nak na uzəngtəng ka ashe onəm ochumchum oshozhashozha, kang igwak chəng nkpktak oshozha ká onəm oga mpyal oshozha.

⁶ Awalang va oshozha kə nle nzhi nvaŋva uDawuda gbál uFilisti va ta chit te, ochar fa ka ashe oga itong oIsarila pa kpaktak pa na ó gwang uponzhi uShawulu. Te oza i shì nnap-nshì kang i gbap nzam, ká nnap-nshì ngga nchang igwak ká igangáng ká oga abwa acham.

⁷ Oza i gbap nzam kang i shì nnap-nshì i là ka pa,

<<UShawulu gbəng oji wò ikalong,

kang uDawuda gbəng oji wò ikalong pa igbapchi.>>

⁸ Nnap nshì va ta lak igwak uShawulu pa gənggəng. Kang uza là pa, <<Iza wa nva ta yà? Oza là pa n gbəng ikalong na byet, kang pa uDawuda gbəng ikalong pa igbapchi. Te iza bur lap da, a bur iponzhi na á na chwat kat dō?>>

⁹ Ka awalang va ta byet te, uShawulu nak iwu uDawuda.

¹⁰ Ipin fa kpaḱ te, Inan re nre ká aruhu abəngbəng ka apal aShawulu ká nkam i nyán ká na. Uza ban nnəm achu wa anəm uranran ka ashe nzhi wò. Te uDawuda bən nnəm abwa á na wa nva uza mà nəm á na á. Nnyi te, uShawulu uwa ka yà ká abár ka awo wò,

¹¹ kang uza ghaḱ abár i là íshi wò pa, <<Mi bəng uDawuda ká ka izər nzhi>> Nnyi te, uDawuda ra nggà nvaḅ pa mparəm.

¹² UShawulu nəm ayər aDawuda, kaḱul uYawe uwa ya nzəng ká uDawuda, nnyi te, uzaḱ kap ká uShawulu chit.

¹³ Te uShawulu fa kaḱ uDawuda re nzhi iponzhi, uzaḱ nak na ya unəm uga mpyal oshozha íkalong, kang uDawuda ləp mpyal ôzaḱ atak íkum.

¹⁴ Kaḱ ashe nkpktak iyəm vaḱ uDawuda nəm te, uzaḱ i nəm igwan, kaḱul uYawe uwa ya nzəng ká na.

¹⁵ Awalang vaḱ uShawulu ya igwan aDawuda chit te, uzaḱ nəm ayəyər.

¹⁶ Nnyi te, nkpktak oIsarila ká oYahuda man uDawuda, kaḱul uzaḱ ləp mpyal ôshozha kaḱ atak íkum ka asal vaḱ məma.

¹⁷ UShawulu là ûDawuda pa, <<Mi ga nna uyen mi uchar ugəshi, uMerap a bu, bu kam ichar ká na. Nnyi te, bu nyám ishi bu á mi pa mmabu uyen unungwan kaḱ atak nlung íkum àYawe.>> UShawulu kaḱ nrəng kaḱ ashe igwak pa, <<Awo mi i dok na kaḱ, re oFilisti oma á gbál na.>>

¹⁸ Kang uDawuda là ûShawulu pa, <<Mmami uda yà, akum mi izaḱ kaḱ ashe oIsarila kang mi yà ugwar àponzhi yà? Akum apo mi chu iyəm iro kaḱ.>>

¹⁹ Awalang chu chit paḱ mmá na uMerap ûDawuda paḱ á kam, te uShawulu yar na ná ûAdəriyel, unəm oMehola.

²⁰ Te uya àShawulu uMikal man uDawuda byet, kang nvəngvaḱ uShawulu fe te, igwak chàng na.

²¹ Te uShawulu là îshi wò pa, <<Mi na uMikal ûDawuda, na n lwak na ká, na oFilisti á gbál na.>> Kang uShawulu là ûDawuda kàḱi pa, <<Nyangmatà bu ga nỳà ugwar mi.>>

22 Te uShawulu là ônəm wò pa, <<Ó là ûDawuda ka_ ayi pa, <Dər uponzhi mən bu byet kang mmayi kpa. Nyangmata mən na u yà ugwar àponzhi.> >>

23 Oza là nnap va ta ûDawuda. Nnyi te, uDawuda là pa, <<Ó rəng pa nnap mbwakan pa unəm a yà ugwar àponzhi dò? Mmami unəm ukunkun u va mmá nyi na mak kat.>>

24 Awalang va onəm aShawulu le ga là ûponzhi iyam va uDawuda là te,

25 uza là pa, <<Ó là ûDawuda pa, n dom iyam igwar iro kat, iyam va n dom te, awa anung ache oFilisti igbal, kakul na mmá pyat akat ka apal okpa ikum àponzhi.>> Ndom aShawulu na ta pa oFilisti a gbal uDawuda.

26 Awalang va onəm aShawulu là nnap va ta ûDawuda te, igwak chəng uDawuda. Te uza mən pa ô yà ugwar àponzhi. Kang ilum va ta i chu,

27 uDawuda wong ká onəm wò ga kang á gbəng oFilisti igbal pa iparəm kyən awa ache oza. Oza kung mmak iyəyil ûponzhi na uDawuda a yà ugwar àponzhi. Te uShawulu na uyen wò uchar, uMikal ûDawuda yà uchichar.

28 Awalang va uShawulu nyi chit pa uYawe uwa ya nzəng ká uDawuda, kang uyiyeu uMikal dom uDawuda byet,

29 te ayər nəm uShawulu jujwak ká uDawuda. Uza nak uDawuda sat ukpa ikum wò ká nkpktak iriririri.

30 Kang awalang va kpaktak onəm oga mpyal ikum oFilisti i ru ikum te, uDawuda i nəm igwan ka apal oza iji abo onəm oga mpyal ikum àShawulu ji. Kakul nva ta te, adin aDawuda dam pa gənggəng.

19

UShawulu dak pa ô gbal uDawuda

¹ UShawulu nok nkpaktak okpari wò ká uJonatan uyiyen pa oza agbal uDawuda. Nnyi te uJonatan man uDawuda byet,

² uza là á na pa, <<Upo mi ka nram bu pa ô gbal. Kaku nva ta te, nem pa dakdak ipin ká ibotak te, ram atak mbwam kang bu tem ka ta.

³ Mi là upo mi pa i fa i tong ka agbagba ka atak va u bwam ka, kang mi là nnap á na ka apal ishi bu. Te mi là a bu iyam va pa kpaktak n fe katatak.>>

⁴ Ipin fa kpak te uJonatan là nnap nnenan ka apal aDawuda upo wò. Uza là pa, <<Kang wa nem iyam ibangbang ukpari bu uDawuda kat aponzhi, uza uwa a nem iyam ibangbang iro a bu chit kat. Iyam va uza nem te, nna ya ká nkamshi á bu pa makmak.

⁵ U kong ka nva uza yang ká iriri wò uza gbal agbar oFilisti, nna nak te uYawe na igwan oIsarila kat dò? Iyam va ta a chang igwak a bu pa genggeng. Te sang kang bu dom pa u gbal unem unenan wa aDawuda ya? Ipir iga ngbal na ya kat.>>

⁶ Te uShawulu gwong achwang ka nnap-nla aJonatan kang uza song anung pa, <<UYawe uwa ya te, unem uro i gbal uDawuda kat.>>

⁷ Ka nvang va ta te, uJonatan wor uDawuda a shal á na iyam va upupo là á. Te uza kam uDawuda ga ká ka atak aShawulu, ta byet te iyam ra pa dakdak wa nva ka ya matmat á.

⁸ A gbang nvəng kaṭ te ikum fa kàḍi, te uDawuda ga ká oshozha wò ru oFilisti ká ikam. Kang uza gbáng oza pa makmak oza chəng.

⁹ Nda nro uShawulu wa ka ntəm ka nzhi wò ka abár ka awo, te uYawe re ñre ka aruhu abángbang uShawulu i nyán ká na kàḍi. Te uDawuda bàn nnəm abwa á na wa nva uza ma ném á,

¹⁰ te uShawulu yar abár pa ô bàng uDawuda ká ka izər nzhi, ñnyi te, uDawuda ra nggà kang abár ga bàng izər nzhi. Kang uDawuda fa ká izwam va ta chər.

¹¹ UShawulu re ñre ka onunggwan pa a pángchí nzhi aDawuda, na oza á gbál na ká ibotak. Ñnyi te, uMikal uchar aDawuda, là á na pa, <<A yà pa bu chər ká izwam va ta kakul iriri bu kaṭ, ipin i kpak te, mí gbál bu.>>

¹² Te uMikal nak uDawuda fa ka mbol ayir nzhi kang uza chər.

¹³ Te uMikal yar ichər nak ka apal alyer kang a dang ká iyam iga ndang izər kang a nak akpap ibəl ka ishishi.

¹⁴ Awalang va uShawulu re ñre ká onunggwan pa a kpán uDawuda te, uMikal là ôza pa, <<Uza rurwa.>>

¹⁵ Te uShawulu re onunggwan pa á ga á dər uDawuda kang à là ôza pa, <<Ó ba ká na á mi ka apal aləlyer na n gbál na.>>

¹⁶ Ñnyi te, awalang va oza ba táng te, oza ya ichər ka apal alyer kang ká oga akpap ibəl ka ishishi.

¹⁷ UShawulu là ûMikal pa, <<Sang kang u lam mi wa nta yà kang u re ukpa ikum mi gà yà?>>

UMikal là a na pa, <<Uza là a mi pa, <Re mi ngga. Le kang ma gba₁ bu.> >>

¹⁸ Awalang va uDawuda chər chit, te uza ga atak aSamuwel ka aRama, kang uza là á na nkpaktak iyam va uShawulu nəm á na. Te uSamuwel ká uDawuda ga aNayot kang à təm ka ta.

¹⁹ Mmá là ûShawulu pa, <<UDawuda wa ka aNayot ka aRama,>>

²⁰ te uza re onunggan pa á ga á kpan na. Nnyi te, awalang va oza ga ya idongkong onəm oga nlà ichu Inan ka nlà iyam va ka ngga nfa, kang uSamuwel wa ka ta wa anəm uga mpyal oza, te aruhu Inan väng ka apal onunggan aShawulu, kang oza bàn nlà iyam va i ga nfa kpa.

²¹ Mmá là ûShawulu iyam va kà nchen te, uza re nre ká onunggan okak kađi kang oza là iyam va iga nfa kpa. UShawulu re nre ká onunggan ngga nshishat kang oza bàn nlà iyam va i ga nfa kpa.

²² Ká nkukur te, uza wong ká ishi wò kà ngga aRama kang uza ga chu ache ndəng nchumchum nkapkap ka aSeku te, uza bəp pa, <<USamuwel ká uDawuda ka che yà?>>

Mmá là á na pa, <<Oma yà ka aNayot ka aRama.>>

²³ Te uShawulu ga aNayot ka aRama. Nnyi te, aRuhu Inan väng ka apal ishishi kpa kang uza kà nchen kà nlà iyam va i ga nfa uza ga chu ká, ka aNayot.

²⁴ Uza zəp ilukwan wò kang uza là iyam va i ga nfa kpa kà mpyal aSamuwel. Uza ra umaləng nkpaktak alum ká izwam. Iyam va ta nak kang

onəm i là pa, <<UShawulu ka ashe onəm oga nlà
ìchu Inan kpa dò?>>

20

UJonatan kamshi ûDawuda

¹ Te uDawuda chər ka aNayot ka aRama ga atak
aJonatan. Uza bəp na pa, <<Iza n nəm yà? Iza
mpat mi yà? N nəm mpat ūpo bu wa nsang kang
uza dom pa ô gbál mi yà?>>

² Te uJonatan là pa, << Pa kaṭ, mmabu kà ngga
nkú kaṭ. Dər, upo mi i yà kà nnəm iyam iro
ichumchum kaṭ te ifwakan i va uza i nəm mi nyi
kaṭ dò kaṭ. Kaṭul iza kang uza i bwam i va ta kà
mi yà? Iyam iro yà pa kaṭ.>>

³ Nnyi te, uDawuda sòng anung là pa, <<Upo bu
nyinyi pa kpátkpát pa nna n yà ká nchər mbalbal
kà mpyal bu, te uza là ishi wò pa, <A màl pa
uJonatan á nyi nnap va ta kaṭ, kaṭ te i lak igwak
a na.> Nva uYawe wa yà ká iriri kang na u yà ká
iriri te, ishimshe mi ká ikú a bur ntong ashar.>>

⁴ UJonatan là ûDawuda pa, <<Nkpaktak iyam va
u dom pa n nəm a bu te, mi nənəm a bu.>>

⁵ Te uDawuda là á na pa, <<Dər, ipin te mí ga
nnəm nchang izər ngga ape apipe, kang a màl pa
n təm nrì iyam-nrì nzəng ká uponzhi, nnyi te, re
mi mbwam ka ashe nzam a ga a chu arurong aga
nra ngga nshatding kang.

⁶ A yà pa upo bu a lang mi te, là a na pa,
<UDawuda chál mbar pa ô ga nzhi wò ka aBet-
Lehem kəlak kang, kaṭul nləfər ngga akum ijili
oza ngga nza izun nggo.>

⁷ A yà pà uza là pà, <Dakdak,> te i nyám ðak pà uzwal bu yà ká ndaktak kať. Nnyi te, a yà pà uza mən ikum ká bu te, bu nyi ðak pà uza kà ndom nnəm ibángbàng á mi.

⁸ Mmabu te, wa nyám nnap nnənan ūzwal bu, kakul u yar nsar nnap-nlā ká mi chit kà mpyal aYawe. A yà pà m pat te, wa gbál mi ká ishi bu. Sang kang bu na mi ka ashe awó apo bu yà?>>

⁹ UJonatan là pà, <<Pa kať, ka yà pà n nyinyi pà upo mi uwa ya ká ibángbàng iro kakul bu te, ká nlā a bu kať dó?>>

¹⁰ UDawuda bəp uJonatan pà, <<A yà pà upo bu man a bu ká ikum te, uda i là á mi yà?>>

¹¹ UJonatan là á na pà, <<Fa í ga ashe agbagba.>> Te oza fa ga ashe agbagba.

¹² Te uJonatan là ūDawuda pà, <<N sɔng anung kà mpyal àYawe, Inan ìga alsarila, ká awalang wanta ipin kať te nlomo te, mi ðak na n nyi nrəng nnàp apo mi. A yà pà uza uwa ya ká iyam iro ká igwak ka apal bu te, mi re nre mí là a bu.

¹³ Nnyi te, a yà pà upo mi uwa dom nnəm iyam ibángbàng iro a bu te, re uYawe á nyán ká uJonatan pà gənggəng, a yà pà n nyám ka a bu kať kang nre bu u ga ká ikangkang. Te re uYawe á yà nzəng ká bu wa nva uza ka yà nzəng ká upo mi á.

¹⁴ Nnyi te, nyám ikin ikúrkúr kať á mi wa ikin aYawe a yà pà n na n yà ká iriri á, na kang mmá gbál mi kať.

¹⁵ Awalang va uYawe á zhì nkpaktak okpa ikum aDawuda ka apambin te, kang wa re nyám ikin bu n̄zhi mi kať mbyet mbyet.>>

16 Te uJonatan yar nsàr nnap-nlà ká nzhì àDawuda là pa, <<Re uYawe á zhì okpa ikum aDawuda pa kpaktak.>>

17 Kang uJonatan nak uDawuda yar nsóng anung kàdi kakul man va uza ká a na, kakul uza man na wa va uza man ishi wò.

18 Te uJonatan là ûDawuda pa, <<Îpin te, mí nəm nchang izər ngga ape apipe kang mí lang bu kakul atak ntəm bu i təm nlakchi.

19 Nlomo ka arurong te, ga atak va ka u bwam ká awalang va ndaktak va ta ban, kang bu lok kà ngbak ipang aEzel.

20 Mi tat iwar pa ishatding i ga ngbak ipang va ta, na mmami kà mmang ìji.

21 Te mi re uyen ununggwan kang mi là a na pa, <Ga mwo iwar va ta.> A yà pa n là á na pa, <Dər, iwar va ta kà ngbak va ta, kà ishimshe mi ká bu, ba ká ka ta,> te wa ba, kakul wa nva uYawe wa ká iriri te, na u yà ká iriri, ndaktak nro yà ka.

22 Nnyi te, a yà pa n là ûyen ununggwan va ta pa, <Dər, iwar na yà kà mpyal bu,> te nkpak pa u ga, kakul uYawe re bu chit pa u ga achen bu.

23 Kang ka apal iyam va ta ká i shal te, i rəng ká, uYawe uwa sat ká ishimshe mi ká bu mbyet.>>

24 Te uDawuda bwam ka ashe nzam, kang awalang va mmá bàn nnəm nchang izər ngga ape apipe te, uponzhi təm pa ô ri iyam-nri.

25 Uza təm ka atak va uza mmà təm ka ka izər nzhì, uJonatan təm mál ikwoksok ká na, kang uAbner təm kà ngbak aShawulu, nnyi te, atak ntəm aDawuda təm nlakchi.

26 UShawulu là iyam iro n̄da va ta ka, kakul uza rəng pa, <<Iyam iro na ya uDawuda va nak na yà

ká adak. Nna nak kang uza yà kà atak nchang izər kat.>>

27 Nnyi te, ipin fa kpak, kà nra ngga mparəm ngga ape te, atak aDawuda nna a təm nlakchi. Te uShawulu bəp uyən wò uJonatan pa, <<Iza nak kang uya àJese ba atak nri iyam-nri kà nlam kat, kat te nda kat yà?>>

28 UJonatan na aman pa, <<UDawuda bəp mbar bəp kà atak mi pa ô ga aBet-Lehem.

29 Uza là á mi pa, <Re mi n ga, kakul nzhi yi kà ngga nnəm nləfər kà ashe itong, kang ugənanng mi nak pa n yà kà ta. A yà pa nchər mi bəbal kà mpyal bu te, re mi, n ga n ya ogənanng mi.> Nna nak kang uza ba atak nri iyam-nri aponzhi kat.>>

30 UShawulu yà ká nlək igwak pa gənggəng kà uJonatan kang uza là á na pa, <<Mma bu uyen unungwan ulakchilakchi, amar achar umaimai. N nyinyi pa mma bu kà nləp asəm uDawuda uya aJese na a yà uponzhi kà anung bu, wanta na u dom pa u ná iwuswa îshi bu ká unang vā mar bu dō?

31 Nva pa uya aJese uwa ká irirì kà apambin vā ta te, bu yà uponzhi kat. Nyangmata te, re unəm uro á ba ká na a mi, kakul nkpak pa uza a kú.>>

32 Te uJonatan bəp upo wò pa, << Mí gbál na kakul iza yà? Iza uza nəm yà?>>

33 Nnyi te, uShawulu mang na ká abár pa na ô gbál na. Nna chit te, uJonatan nyi đak pa, upo wò kà ndom ngbál uDawuda.

34 Te uJonatan wong kà apal atebəl kà ashe nlək igwak pa gənggəng, kà nra ngga mparəm ngga nchang izər vā ta, uza ri iyam-nri kat, kakul a

ɖak na byet ka iyam va upupo là a na ka apal aDawuda.

³⁵ Ká ipin te, uJonatan fa ga ashe nzam pa na ô gwang ká uDawuda wa nva oza ka sar á. Uza ga ká uyen ununggwan ubwakan nzəng ká na,

³⁶ kang uza là uyen ununggwan va ta pa, <<Chér na u mwo iwar va n tat.>> Nva uyen ununggwan va ta ka nchér te, uza mang iwar ka mpipyal.

³⁷ Awalang va uyen ununggwan va ta ba chu atak va iwar aJonatan ru ka te. UJonatan wor na là pa <<Iwar ya ka mpyal bu kat dó?>>

³⁸ Te uza ləp achu á na pa, <<Ghəghan, ga pa kəlak, kang wa kali kat.>> Te uyen ununggwan va ta yar iwar va ta kang a ga ká ûnem uga nzhi wò.

³⁹ Uyen ununggwan va ta nyi iyam iro ka apal nkpktak iyam va ta kat. UJonatan ká uDawuda oma nyi chwat.

⁴⁰ Te uJonatan na oga iyam abang wò uyen ununggwan va ta kang à là a na pa, <<Wur, ga ka oza ka itong.>>

⁴¹ Nvangva uyen ununggwan va ta ga chit, te uDawuda fa ka asal nkwandal ipang vata kang à bəram ká mpyal aJonatan nvang pa nshatding, uza kwangtal asal awu wò ka avəng. Te oza fəkchi owan oza kang oza yəng, nnyi te, uDawuda uwa yəng ji.

⁴² UJonatan là ûDawuda pa, <<Ga ká ikánkáng, kakul í yar nsar nnap-nlà ikpa owan yi chit ka ashe adín aYawe, i là pa, <UYawe uwa sat ka ishimshe mi ká bu, kang ka ishimshe oga akum

ijili bu ká oga akum ijili mi mbyet.> >> Te uDawuda ga, kang uJonatan le ga ashe itong.

21

UDawuda ka aNop

¹ UDawuda ga aNop ka atak aAhimelek unəm uga mpyal awop. UAhimelek ya na te a tán, kang uza bəp na pa, <<Sang kang mmabu ka nkukwa, unəm uro nzəng ká bu kaɥ yà?>>

² UDawuda na aman ũAhimelek unəm uga mpyal awop pa, <<Uponzhi re mi ka nre, kang a là a mi pa, <Kang unəm uro a nyi iyam iro ka apal nre va mmami ka nre bu ka kaɥ.> N là atak va onəm mi chit pa oza a gwang mi ka.

³ Nyangmata te, iza mmabu ká yà? Na nzəngkəng á mi pa ntukun, kaɥ te iyam va kap mmabu ká á.>>

⁴ Nnyi te, unəm uga mpyal awop na aman ũDawuda pa, <<N yà ka nzəngkəng ngga nri onəm pa vavà kaɥ, nva mmami ka te nzəngkəng nyeryər, o riri, a yà pa ovan nza va mmabu ká oma ra ka ochar chit kaɥ.>>

⁵ UDawuda na aman pa, << Pa dəkər te, í pángchí ishi yi ka nnap ochar a yà pa í wong achen wa nva ta. Kang jwak pa achen va ta ká ipipir.>>

⁶ Te unəm uga mpyal awop na nzəngkəng nyeryər á na kakul pa nzəngkəng nro yà ka atak kaɥ, nva ka ta te, nva mmá yar chit ká mpyal àYawe ka apal atebəl, kang mmá nak nkak nsur ka atətak.

⁷ Nda va ta te uDoyek unəm oEdom, unəm uga mpyal ga nkpak iyam nkang àShawulu uwa kata, uva mmá gəl na kà mpyal àYawe.

⁸ UDawuda bəp uAhimelek pa, <<Nna u ya ká abár kat te ndokchi kà ta dò? N yar ndokchi kat te iyam ikum iro kat, kakul inok aponzhi iga ijəjak, á nak te n fa kà ngghan.>>

⁹ UAhimelek na aman pa, <<Ndokchi aGoliyat unəm oFilisti na byet uva u gbál kà mbandam aEla, na mmá chəndər mmá nak kà nsəm ilukwan ikwoksok. Yar a yà pa u dɔdom á, kakul nna mmami ká byet.>>

Te uDawuda là pa, <<Á byen byet, na á mi.>>

UDawuda kə aGat

¹⁰ Kà nda va ta te, uDawuda chər kə atak aShawulu kang a ga atak aAkish, uponzhi uga aGat.

¹¹ Nnyi te, okpəri aAkish là á na pa, <<UDawuda va ta uponzhi uga mbin kat dò? Uwa oIsarila i shi nnap ká na pa,

<< <UShawulu gbáng oji wò ikalong, kang uDawuda gbáng oji wò ikalong pa igbapchi> kat dò?>>

¹² UDawuda kpan oga nnap-nlà va ta kə igwak kang ayər nəm na pa gənggəng kakul aAkish uponzhi uga aGat.

¹³ Te uza gaban i nəm wa anəm uranran, nkpaktak awalang va uza nzəng ká oza te, uza i nəm wa anəm uranran, uza i cha iyam kə izər anung oga asal kang uza re nshí i wər á na kə nggyer.

14 UAkish là ôkpari wò pa, <<Ó dər, unəm və ta á rərən. Sang kang ó ba ká na á mi yà?

15 N lang onəm oranran kang o ba ka unəm və ta pa a pak inok nnəm nran kə mpyal mi dò? Nkpak pa unəm a ta a ba mpyal mi dò?>>

22

UDawuda ka aAdulam ká aMizpa

1 UDawuda re aGat kang uza chər ga agbak aga aAdulam. Awalang və ogənanngənanang ká nkpaktak onəm oga nzhi apupo fe te oza fa ga ya na kata.

2 Nkpaktak onəm və ka ashe mbək anung, ká ovəngva ká akat, ká ovəngva ká mbaŋg igwak, oza but ka atak aDawuda. Onəm ga chu igbəl pa ineding kang uza yà unəm uga mpyal oza.

3 Ka ta te uDawuda wong ga aMizpa kə mbin aMowap, kang uza là ũponzhi oMowap pa, <<Kusuk bu məman pa n re upo mi ká unang mi á təm ka atak bu, na n nyi iyam və Inan i ga nnəm á mi kang dò?>>

4 Te uza re oza ká uponzhi oga aMowap kang oza təm ká na ka ashe nkpaktak awalang və uDawuda uwa kə mbwam ka atak mbwam wò á.

5 Nnyi te, unəm uga nlà ichu Inan, uGat là ũDawuda pa, <<Kang wa təm ka ashe atak və mmabu kə mbwam ka kat. Ga ashe mbin aYahuda.>> Te uDawuda ga ashe ikun iga aHeret.

UShawulu gbəng onəm oga mpyal awop oga aNop

6 Nyangmata te, uShawulu fe pa mmá ya atak aDawuda ká onəm wò chit. Kang uShawulu uwa

kā ntəm kā aGibeya kā avəng ikun atamariki kā apal aduktum, uwa kā abár kā awo, kang onəm oga nəm inunok tong kā nggbəgbək.

⁷ Uza là ôzə pa, <<Ó gwong achwang ônunggwan oga aBenjamin, uya aJese i na iram na ká iram ibangbang nkpaktak wo dō? Uza i nak nkpaktak wo nak ó sat onəm oga mpyal oshozha ikalong kaṭ te igbaḷ dō?

⁸ Nna nak kang nkpaktak wo ó gwang anung kā apal mi dō? Unəm uro yà là á mi kaṭ, awalang vā uyen mi yar nsar nnap-nlà ká uya aJese. A đak unəm uro ká mi kaṭ, kaṭ te á là á mi pa uyen mi nok ukpari mi pa á ra anyimnyal kà mi, wa nva uza nəm ká nda vā ta á.>>

⁹ Nnyi te, uDoyek unəm uga aEdom, uva kā yà kà nsat nzəng ká onəm oga nnəm inok aShawulu te, á là pa, <<N ya uya aJese ba atak aAhimelek uya aAhitub kā aNop.

¹⁰ UAhimelek bəp uYawe a na. Uza na iyaṃ-nrì á na kpa ká ndokchi àGoliyat unəm oFilisti.>>

¹¹ Te uPonzhi re ñre kà uAhimelek uya aAhitub unəm uga mpyal awop ká nkpaktak onəm oga nzhizhi, ova onəm oga mpyal awop kā aNop, kang nkpaktak oza ba atak aponzhi.

¹² UShawulu là pa, <<Gwong achwang kà mi, á ya aAhitub.>>

Uza na aman pa, <<Mmami kà nfe bu ánəm uga nzhì.>>

¹³ UShawulu là a na pa, <<Iza nak kang ó gwang anung kà mi, mmabu ká uya aJese, u na iyaṃ-nrì á na ká ndokchi, kang u bəp Inan á na, nnà kang

uza_fa iyamkak ká mi, kang i ra anyimnyal kà mi, wa nva_ uza_ nəm n̄da va_ ta_ yà?>>

14 UAhimelek na aman_ ûponzhi pa, <<Unəm uro wa yà kà ashe nkpaktak okpəri bu ká nnandər wa aDawuda ugwar bu, uwa unəm uga mpyal onəm oga mpángchí bu, kang uwa mmá na ichumchum á na jì kà ashe nzhi bu dò?

15 Nna ta_ kang mmami kà mbəp Inan kakukul nggəshi dò? Wanta kat_, re kang uponzhi a ná mpat ûkpəri wò kat_ te unəm uro kà ashe nzhizhi kat_, kakul ukpəri bu nyi iyam iro kà apal ngwang anung kà apal bu kat_.>>

16 N̄nyi te, uponzhi là pa, <<ÁAhimelek, nkpak pa u kú mmaḅu ká nkpaktak nzhi apo bu.>>

17 Te uza_ là onəm oga mpángchí na va_ kà mbəbəp pa, <<Ó gbáng onəm oga mpyal awop aYawe va_ ta_, kakul oza_ gwang anung ká uDawuda. Oza_ nyinyi pa_ uza_ kà nchər, te unəm uro kà ashe oza_ là á mi kat_.>> N̄nyi te, onəm oga mpyal àponzhi yang ká nghap awo pa_ na ó ngbáng onəm oga mpyal awop aYawe va_ ta_.

18 Te uponzhi là ûDoyek pa, <<Gaḅan_ gbáng onəm oga mpyal awop va_ ta_.>> Te uDoyek unəm uga aEdom gbáng oza_. N̄da va_ ta_ te, uza_ gbáng onəm isəm pa_ nanne aman_ pa_ tukun, ova_ mwak ilukwan ikwoksok iga alinin.

19 UShawulu nak kpa mmá gbáng onəm oga aNop, itong onəm oga mpyal awop. Mmá gbáng onungwan ká ochar, ovan ká_ ovanbak_, ká_ ina, ká_ azhaki, ká_ itam.

²⁰ Nnyì te, uAbiyatar uzəngtəng kà ashe ovan onungwan àAhimelek uya aAhitub, a mulit kang à chər ga atak aDawuda.

²¹ Uza là ûDawuda pa, <<UShawulu gbəng onəm oga mpyal awop aYawe chit.>>

²² Te uDawuda là ûAbiyatar pa, <<Kà awalang vā n ya uDoyek unəm oga Edom kəta n̄da vā ta te, n nyi nkpak pā uza i ləla ûShawulu. Kəkul mi na mmá gbəng onəm oga nzhi bu pā kpaktak.

²³ Təm ká mi, kang ayər a nəm bu kət. Unəm vā kà ndom ngbál bu te, kà ndom ngbál mi na kpa. Nzəng kà mi te, iyəm iro i nəm bu kət.>>

23

UDawuda kəmshi aKeyila

¹ Awalang vā mmá là ûDawuda pa, <<OFilisti kà nlung ikum ká aKeyila, kang kà ngwur ipirkur ká ayi kà atak mpək iyəm,>>

² te uza bəp uYawe pa, <<N ga na n ru oFilisti vāta ká ikum dō?>>

UYawe na amən á na pa, <<Ga na u ru oFilisti ká ikum, na u kəmshi aKeyila.>>

³ Nnyì te, onəm aDawuda là á na pa, <<Kà ta, kà ashe mbin aYahuda te, mmayi kà ntəm ká ayər, te i yà sáng kang pā i ga aKeyila na i lung oshozha oFilisti yà?>>

⁴ UDawuda bəp uYawe kədi, kang uYawe na amən á na pa, <<Ga aKeyila, kəkul mmami kà ngga nna oFilisti kà ashe awo bu.>>

⁵ Te uDawuda ká onəm wò ga aKeyila. Oza nyán kà oFilisti kang à gbəng oza pā makmak, oza

wur iyam nkang oza, kang oza kamshi onəm oga aKeyila.

⁶Awalang va uAbiyatar uya aAhimelek chər ga atak aDawuda ka aKeyila te, uwa ka ya ká ilukwan ikwoksok.

UShawulu bàk nvəng aDawuda

⁷UShawulu fe pa uDawuda ka aKeyila te, uza là pa, <<A byen pađi, Inan ná na chit ka ashe awo mi. Ka kul uza tar ajəp chit, nva uza tar ashe itong va mmá ká ká akamsəlang kang mí kùk anunung kùk ká ndar acham nnárnàr.>>

⁸Te uShawulu wór nkpaktak oshozha wò kakul ikum, pa oza á ga aKeyila oza á gang uDawuda ká onənəm.

⁹Awalang va uDawuda fe iyam ibángbāng va uShawulu kà ndom nnənəm a na te, uza là ũAbiyatar unəm uga mpyal awop pa, <<Ba ká ilukwan ikwoksok va ka ta.>>

¹⁰Te uDawuda far pa, <<ÁYawe, Inan oIsarila, n fe pa uShawulu kà ndom pa ô ba ô zhì aKeyila kakul mi.

¹¹Onəm oga aKeyila i na mi na á na dō? UShawulu i vəvang wa nva mmami uzwal bu nfe dō? ÁYawe, Inan oIsarila, là ũzwal bu.>>

Te uYawe na aman pa, <<Uza i vəvang.>>

¹²UDawuda bəp kàđi pa, <<Onəm oga aKeyila i na mi na ká onəm mi ũShawulu dō?>>

Te uYawe man pa, <<Oza i na wó na.>>

¹³Te uDawuda ká onəm wò igbal pa ikpađing fa re aKeyila, oza i ranggang atak pa kpakpa. Awalang va uShawulu fe chit pa uDawuda fa chit re ashe aKeyila, te uza đak ngga a ta lap kat.

¹⁴ UDawuda təm ka atak mbwam ka aduktum aga ashe nzam mmaləng aZif. UShawulu nəm inok nram na ka ashe nzam nra ka apal nra, nnyi te, Inan ná na ka ashe awo aShawulu ka.

¹⁵ Nva uDawuda uwa ka yà ka aHoresh ka ashe nzam aZif te, uza fe pa uShawulu fa ka nram na pa na ô gbál.

¹⁶ Kang uJonatan uya àShawulu ga atak aDawuda ka aHoresh, á na nkám irəng á na pa uza á sat kà Inan á kəkam.

¹⁷ UJonatan là á na pa, <<Kang ayər á nəm bu ka. Awo apo mi uShawulu i yà ka ndok bu ka. Mmabu ka ngga nya uponzhi oIsarila, kang mi yà uga uparəm bu. Upo mi uShawulu nyi nva ta nyi.>>

¹⁸ Mparəm oza yar nsar nnap-nlà owan oza ka mpyal àYawe. Te uJonatan le nzhi nnyi te, uDawuda təm ka aHoresh.

¹⁹ Onəm oga aZif ga atak uShawulu ka aGibeya kang oza là á na pa, <<UDawuda uwa yà kà mbwam ka ashe yi, ka atak mbwam ngga aHoresh ka aduktum aHakila, ava ka nkwandál aJeshimon ka dò?

²⁰ Irirì aponzhi a gbang, ilum va wa dom te, wa väng, í kpan na í na ka ashe awo bu.>>

²¹ UShawulu na aman pa, <<UYawe á nak nnap nnənan á wó, kakul ó nak ishi ká mi.

²² Ó ga na ó bəp nnap ka apəpal pa makmak, ó bəp atak va uDawuda i ga kà, ká onəm va ya na. kakul mmá là á mi pa uza tan byet.

²³ Ó ga ó dər na o nyi oga atak va uza i bwam kà, na ó ba ka nnandərnandər á mi. Te mi ga

nzəng ka wó, kang a yà pa u wa ka atak va ta, te mi ram na kà atak va uza bwam kà, kà nkpktak aYahuda.>>

²⁴ Te oza wong ga aZif mpyal uShawulu. UDawuda ká onəm wò oma ka ashe nzam mmaləng aMayon ka mbandam aAraba ka nkwardal aJeshimon.

²⁵ UShawulu ká onəm wò fa kà nram uDawuda, kang nvaŋgva uDawuda fe te, uza fər ga anang aduktum aga ashe nzam mmaləng aMayon kang uza təm kaťa. Awalang va uShawulu fe chit pa te, uza bək nvəvaŋ ka ashe nzam mmaləng va ta.

²⁶ UShawulu ká onəm wò kà ngga kà ngbak anang aduktum nro, ñnyi te, uDawuda ká onəm wò kà ngbak nzəngtəng. UDawuda ka onəm wò kà ngghaŋ pa na ó chəng ka atak aShawulu. UShawulu ká onəm wò ba dat pa na ó kpán uDawuda ká onənəm te,

²⁷ unəm uga ñre ba là ũShawulu pa, <<Ba pa kəlak, oFilisti ba ru oIsarila chit ká ikum.>>

²⁸ Te uShawulu re ngwà uDawuda kang à le ga nlung oFilisti. Nna nak te, mmá wór ađin atak va ta pa, aDuktum aga nKap.

²⁹ Te uDawuda kyén ba ga atak mbwam ngga aEngedi təm kaťa.

24

UDawuda re uShawulu ká iriri

¹ Ka nvaŋgva uShawulu le chit ka atak nnəm ikum ká oFilisti te, mmá là á na pa, <<UDawuda uwa ka ashe nzam mmaləng ngga aEngedi.>>

² Te uShawulu yak oshozha ikalong pa ishatđing ka ashe nkpktak oIsarila pa oza á ga á ram

uDawuda ká onəm wò dát ká Ipang Ibəl iga ashe Nzam.

³ Nva uShawulu chu atak oga afo itam ka apal asal te, uza tar ashe agbak pa na ô man aməng. UDawuda uwa yà kà nkur agbak va ta ká onəm wò kà mbwam kaťa.

⁴ Onəm aDawuda là á na pa, <<Ilum va ta uYawe ka là nnap kà, nva uza ka là a bu pa, <Mi na unəm uga nkpang bu ka ashe awo bu, na u nəm iyam va ka na u dom á.> >> Te uDawuda nár ga pà arwangchwang ilukwan aShawulu nzəng ká nnyi aShawulu kaťa.

⁵ Ka nvəvəng te, igwak aDawuda ra kaťa, kakul nva uza pà arwangchwang ilukwan aShawulu á.

⁶ Uza là onəm wò pa, <<UYawe a kap mi ká, nva pa nnəm iyam va ta unəm uga nzhi mi, ugorgor aYawe, kaťa te, n dok na ká awo mi kakul uza uwa ugorgor aYawe.>>

⁷ Ká oga nnap-nlà va ta uDawuda ran ká onəm wò, kang uza gəl oza kà ngbál uShawulu. Te uShawulu fa ka ashe agbak ga iyam wò.

⁸ Te uDawuda fa ka ashe agbak kang à wór uShawulu pa gbəngbəng pa, <<Ánəm uga nzhi mi, uponzhi.>> Ka awalang va uShawulu gəbən ya uDawuda te, uDawuda ru zəp ká afu kà mbin.

⁹ Uza là uShawulu pa, <<Sang kang bu gwong achwang kà onəm va là pa, <UDawuda kà ndom nnəm inga a bu> yà?

¹⁰ Nda va ta u ya chit ká iwu bu asal va uYawe na bu ka ashe awo mi, awalang va na u yà ka ashe agbak. Onəm oro là pa í gbál bu, nnyi te, n re bu ká iriri. N là pa, <Mi nak awo mi ka apal anəm uga nzhi mi kaťa, kakul uza ugorgor aYawe.>

11 Apo mi, dər arwangchwang ìlukwan bu ka ashe awo mi. M pà arwangchwang ìlukwan bu, ònyi te, n gbál bu kət. Iyam iro yà ka ashe awo mi va nyám pa, mmami ká mpat, kət te n fa iyamkak kət. N nəm mpat a bu kət, ònyi te, mmabu kà nram mi pa ú gbál.

12 Re uYawe á nap akwali ká ishimshe mi ká bu. Kang re uYawe a pyat mpat va u nəm a mi, ònyi te, awo mi i yà ká ndok bu kət.

13 Wa nva ntar achu mmatmat là pa, <Ka ashe onəm onga na, iyam inga i fa.> Kakul nva ta te, awo mi i yà ká ndok bu kət.

14 <<Mmabu va uPonzhi oIsarila, uda u fa pa u lung yà? Uda bu bak yà? Aməma pa u lak awalang bu kà mbak iva ikuku, kət te ibebe wa nji mi dò?

15 Re uYawe á nap akwali á yi na uza a van nnandər ká ishimshe yi. Re uza a yà unəm uga nkamshi mi, uza i kamshi mi ka ashe awo bu.>>

16 Nvangva uDawuda gbál ka nlà nnap va ta te, uShawulu bəp pa, <<Ichu bu yà dò, ayen mi, uDawuda?>> Kang uza yéng pa gbánggbáng.

17 Uza là uDawuda pa, <<U ji mi ji ká nnandər. U nəm ikin á mi, ònyi te, n nəm íbángbàng á bu.

18 Nyangmata u là á mi chit inənan va u nəm á mi, uYawe na mi ka ashe awo bu, ònyi te, u gbál mi kət.

19 Uda pa wat, i ya ukpa ikum wò ka ashe awo kang i re i ga ká ikánkáng yà? Re uYawe á mwa bu ká inənan kakul inənan va u nəm á mi n̄da va ta á.

20 N nyi chit ñyangmata pa bu ga ñya uponzhi kang iponzhi oIsarila i ga mpyal ka ashe awo bu.

21 Ñyangmata, sɔng anung á mi kà mpyal àYawe pa bu yà ká ngbáng akum ijili mi, kat te bu dərəkən adin mi ka ashe nzhi apo mi kat .>>

22 Te uDawuda yar nsar nnap-nlà wò ûShawulu. Te uShawulu ga nzhi, ñnyi te, uDawuda ká onung-gwan wò le kyen ga atak mbwam oza.

25

UDawuda ká uNabal ká uAbigel

1 Ka nvəvəng te, uSamuwel kú, kang nkpaktak oIsarila but kakul ñyɛng ikuku. Oza li na ka nzhizhi ka aRama. Te uDawuda wong ga ashe nzam mmaləng aParan.

2 Unəm uro uwa yà ka aMayon ká iyəm nkang ka aKarmel kang à dur byet. Uza ká ibəl ikalong kang itam ikalong pa ishating kang u wa kà nkpak akpat itam wò ka aKarmel.

3 Unəm va ta adidin ka yà pa uNabal, uchichar adidin ka yà pa uAbigel. Uza ka yà uchar ubyenbyen uga aghan, ñnyi te, ubəbar unəm uga mbang ka afu kang à yà ká ador kat ka ashe iyəm va uza i nəm, uza ka yà ka akum ijili aKalip.

4 Awalang va uDawuda ka ashe nzam mmaləng te, uza fe pa uNabal ka nkpak akpat itam wò.

5 Te uza re ovan nza wò pa ogbapchi, kang à là ôza pa, <<O ga atak aNabal ka aKarmel na o re anung á na ka ashe adin mi.

6 Ó là á na pa, <Irirì bu á təm mbyet, nnap nnənan a yà ka apal ishi bu ká nzhi bu, ká nkpaktak iyəm va mmafu ká á.

7 << <N fe pa mmabu kà nkpat akpap itam bu. Awalang va onəm oga nkpak iyam nkang bu təm ka ashe yi ka aKarmel te, í nyán ká oza kat kang iyam oza iro yà lar kat.

8 Bəp okpəri bu, te oza i là a bu pa wanta na. Kakul nva ta te, nəm nkamshi onəm mi, kakul i ba ka awalang aga nnəm nchang izər. Kusuk na ozwal bu ká uyen bu uDawuda iyam va pa kap u ya mál pa u na ôza.> >>

9 Nvangva onəm aDawuda chu te, oza là ñre va ta ûNabal ka ashe adín aDawuda. Te oza lok pa ó fe aməman.

10 UNabal na aman okpəri aDawuda pa, <<Uda uDawuda va yà? Uya àJese va uda yà? Ka ashe oga nra va ta te, okpəri onəm pa makmak fa iyamkak ká onəm oga nzhi oza.

11 Kakul iza kang mi yar nzəngkəng mi ká ndəng ngwa mi, ká izhé va m pa kakul onəm oga kpat akpap iyam nkang mi, mi na onungwan ova mmá nyi atak va oza fa ka kat yà?>>

12 Te ovan nzam va uDawuda re te, le ga là á na iyam va uNabal là pa kpaktak.

13 Te uDawuda là ôza pa, <<Uda nggo á gal ndokchi wò.>> Te nkpaktak oza gal ndokchi oza, kang uDawuda gal ndokchi nji wò kpa. Onungwan chu igbal chu pa ineding yar nvang aDawuda, kang mmá re onungwan igbal pa iparəm pa a pángchí iyam ikum oza.

14 Uzəngtəng ka ashe okpəri aNabal là ûAbigel, uchar aNabal pa, <<UDawuda re okpəri wò ka ashe nzam mmaləng pa á ná nre anung wò ûnəm uga nzhi yi, ñnyi te, uza pwat oza.

15 Ká nna kpa te, onungwan va ta nəm inənan á yi byet. I bək anung ka ashe awo oza kat, nkpaktak awalang va mmayi ka atak nkpak iyaṃ nkang nzəng ká oza te, iyaṃ iro yà lar ká yi kat.

16 Oza gang yi wa akamsəlang izwam ká alum. Oza ipángchí yi nkpaktak awalang va mmayi kà nkpak itam dat ka oza.

17 Nyangmata rəng nnap pa dakdak kang bu dər iyaṃ va mal pa u nəm, kakul mbək anung i ga nya ũnəm uga nzhi yi ka nkpaktak nzhezhi. Kakul uza unəm ulakchilakchi uva unəm uro i là nnap á na i kam kat.>>

18 UAbigel ghan wur oga nzəngkəng igbəl pa iparəm, ká ndəng ibangbang ka ashe awa pa parəm, ká itam pa itukun iva mmá pà mmá pək chit, ká ipir ikur iforfor ikpang iga mma iyaṃ pa igbapchi aman pa shatding, ká mbit awar ibangbang va wom chit igbəl, ká mbit awar ipipyān igbəl pa iparəm va wom chit. Uza bak oza ka apal oga azhaki.

19 Te uza là ôkpari wò pa, <<Ó gəga kang mi ba ka nvang wó.>> Nnyi te, uza là atak ngga wò ubar wò uNabal kat.

20 Nva uza kà nkwak azhaki wò ga chu akum abam te, uDawuda uwa ta ká onəm wò kà nfəng nvang, te uza gwang oza.

21 UDawuda ka là pa, <<A sat iyaṃ ilakchi nva n pak inok nnak ishi ká iyaṃ anəm va ta ka ashe nzam mmaləng, kang iyəyaṃ iro yà ka lar kat. N nəm inənan á na nnyi te, uza mwa mi ká inga.

22 Re Inan á zhì mi, a yà pa ipin ká ibotak kang n re unungwan uro re ká irirì ka ashe nzhezhi

pa uzəng á.>>

²³ Awalang va uAbigel ya uDawuda te, uza fər ka apal azhaki wò pa kəlak, uza ru zəp ká afu ka mbin ka mpipyal.

²⁴ Uza ru ka apal ashəshar uza là pa, <<Yar mpat úzwal bu, anəm uga nzhi mi. Re n là nnap ka bu, gwong achwang ká iyam va uzwal bu ká pa ô là.

²⁵ Kang unəm uga nzhi mi á nak ishi ká uNabal unəm ulakchilakchi kaṭ, kaṭul uza wa adidin. Ipir adidin pa mpərək, kang nnəm mpərək i kap ká na kaṭ. Kang wa mmami uzwal bu nnyi te, n ya onəm va u re nre ká kaṭ.

²⁶ Nyangmata, ánəm uga nzhi mi, wa nva uYawe Inan bu uwa ka irirì, kang wa nva na u ya ka irirì, kaṭul uYawe ka dang bu chit ka ntar nchər ká mpyat mpat, re nkpaktak okpa ikum bu ká ovəngva ka ndom pa ó nəm inga á bu a ya wa aNabal.

²⁷ Re unəm uga nzhi mi a kam imwa va ta uzwal bu ba ká á bu, na u ná ôvan nzaṃ va nzəng ká bu.

²⁸ <<N chal bu yar mpat uzwal bu a yà pa m pat a bu ká asal aro á. UYawe Inan bu, i nak iponzhi iga akum ijili bu i təm mbyet, kaṭul ikum va mmaḃu ka nlulung te, iji àYawe. Re mpat nro a yà ka bu kaṭ ka ashe nkpaktak irirì bu.

²⁹ A yà pa unəm uro wong pa ô ram irirì bu te, uYawe, Inan bu uwa i kpak irirì bu ká ikánkáng ka ashe onəm oga irirì. Nnyi te, uYawe i mang irirì okpa ikum bu wa nva mí mang ipang ká nchwalak á.

³⁰ Nvəngva uYawe a yəl nkpaktak iyəm inənən va uza yar nsar nnap-nlā ûnəm uga nzhi mi kà kang uza nak na chit uponzhi oIsarila te,

³¹ kang igwak bu a nak bu pa mmabu ká mpat kat, kat te, bu nak pa na u yà ká nchər ka awo bu kat, kang wa pyat mpat ká ishi bu kat. Nvəngva uYawe Inan bu a na igwan ûnəm uga nzhi mi te, wa rəng ká uzwal bu.>>

³² UDawuda là ûAbigel pa, <<Ashep təm aji aYawe, Inan oIsarila, uva re bu chit n̄da va ta pa u gwang mi á.

³³ Re nnap nnənən a təm ka apal bu kakul aghan bu, nva u dat mi kà ntar nchər kang u dat mi ka mpyat mpat ká ishi mi kpa n̄da va ta á.

³⁴ UYawe dat mi ka nnəm ibángbàng a bu. Ká yà pa u mor u ghan u gwang mi ta kat te, n sòng anung a bu ká uYawe Inan oIsarila uga irirì pa, ipin te, ununggwan àNabal uro yà pa uzəng uva mmá ká re ká irirì kat.>>

³⁵ Te uDawuda kam imwa va uza ba ká ka awuwo, kang à là á na pa, <<Ga nzhi ká ikánkáng. N fe iyəm va chit u là, kang mi nəm iyəm va nəm u dom.>>

³⁶ Awalang va uAbigel le te, á ya uNabal kà nzhi kà nnəm mbut ngga nchang izər wa apir nja aponzhi. Uza ka ashe nchang izər kang à wa iyəm iwawa gbál na pa gənggəng te, uAbigel là iyəm iro á na kat ipin fa kpak kang.

³⁷ Ká ipin awalang va nnap nnəm aNabal ba izəzər chit, te uchichar là á na iyəm va fa pa kpaktak te, ichəgwak ləp na, uza yà wa ipang.

³⁸ Kà nvəng nra pə ngbapchi te, uYawe ləp uNabal kang uza kú.

UDawuda kam ichar ká uAbigel

³⁹ Awalang və uDawuda fe pə uNabal kú chit, te uza là pə, <<Ashep təm aji aYawe, uva sat ka apal mi ka awalang və uNabal bak mi. UYawe dat mi kà nnəm inga kang uza le ká inga aNabal á na chit ka apal ishishi.>>

Te uDawuda re nrè ûAbigel pə, uza a mən ô kam na a yà uchar wò.

⁴⁰ Awalang və onəm oga nre àDawuda ga aKarmel te, oza là ûAbigel pə, <<UDawuda á re yi pə, í kam bu i ba ká na ú yà uchar wò.>>

⁴¹ UAbigel ru zəp ká afu ka mbin, kang à là pə, <<Mmami uzuzwal kang m məman pə n nəm inok á na kang mi nəl ashar ozwal anəm uga nzhi mi.>>

⁴² UAbigel wong pə kəlak kyen azhaki, kang ovan byen oga nnəm inok á na pə otukun yar nvəvəng, kang uza ga nzəng ká onəm oga nre və uDawuda re á. Te uza ga təm uchar àDawuda.

⁴³ UDawuda kam ichar ká uAhinowam uga aJezireyel kpa, kang oza pə oparəm və ta tong ochəchar.

⁴⁴ UShawulu ka yar uyen wò uMikal uchar àDawuda chit, ná ûPalti uya àLayish unəm uga aGalim, a təm uchəchar.

26

UDawuda re uShawulu ká irirì kađi

¹ Onəm oga aZip ga atak aShawulu ka aGibeya oza là á na pa, <<UDawuda uwa ka mbwam ka aduktum aHakila, ava dər aJeshimon kat dō?>>

² Te uShawulu yak oshozha ikalong pa ishatding ka ashe oIsarila va fa ga ká ka ashe nzam mmaləng aZip, pa na ó ram uDawuda.

³ UShawulu ləp apak ka ngbak asal ka apal aduktum aHakila, a va dər asal awu aJeshimon, ñnyi te, uDawuda təm ka ashe nzam mmaləng. Awalang va uDawuda fe chit pa uShawulu ka mbək nvaŋ wò ka ta,

⁴ uza re onəm oga nsòng mbin, kang uza ga nyi pa uShawulu uwa ka ta.

⁵ Te uDawuda wong ga atak va uShawulu ləp apak kə te, uza ya atak va uShawulu ká uAbner uya àNer, unəm uga mpyal oshozhashozha ra kə. UShawulu kə nra ka ashe apak, kə oshozha ra gang na.

⁶ Te UDawuda bəp uAhimelek unəm oHiti ká uAbishayi uya àZeruya, ugənanəg àJowap pa, <<Uda i məman i ga nzəng ká mi ka ashe apak aShawulu yà?>>

Te uAbishayi man pa, <<M məman, mi ga nzəng ká bu.>>

⁷ Te uDawuda ká uAbishayi ga ashe apak aShawulu ká izwam, kang oza ya na kə nra nda ka ashe apak kang abəbar na pak ka mbin dat ká ishishi. UAbner kə abo oshozha oma kə nra nda gang na.

⁸ UAbishayi là ûDawuda pa, <<Inan na unəm uga nkpaŋ bu chit ka ashe awo bu nda va ta. Nyangmata re n tar na kə abár á ga á fu ka mbin pa nzəng pa ták, mi ya ka ndan pa mparəm kat.>>

⁹ Ñnyi te, uDawuda là ûAbishayi pa, <<Kang wa zhì na kaṭ. Uda i nak awo ka apal anəm va uYawe gar kang i yà ká mpat kaṭ yà?>>

¹⁰ UDawuda ga mpyal ká nlà pa, <<Wa nva uYawe uwa yà ká irirì te, uYawe uwa i gbál na ká ishi wò, kaṭ te nra ngga ikuku na i ba kang uza i kú, kaṭ te mí gbál na ka atak ikum.

¹¹ UYawe á dāng mi nva pa n gbál unəm va uza gar á. Nyangmata te, yar abəbar ká abang ndədəng va dat ká ishishi, na í ga.>>

¹² Te uDawuda yar abəbar ká abang ndədəng va dat ká ishishi, kang oza le. Unəm uro ya oza kaṭ te a nnyi iyam iro ka apəpal kaṭ, le kang unəm uro ì yendaḷ. Nkpaktak oza oma kà nra nda, kaḱul uYawe nak oza chit ra nda ndəkdək.

¹³ Te uDawuda paḷ ngbaḱ nro kang à sat ka apal ishi aduktum a va gbəgbang ka atak apak aShawulu. Kang anang agbagba na yà ka ishimshe oza.

¹⁴ Te uza ləp achu ôshozha ká uAbner uya àNer pa, <<Mmaḅu ká nfe mi dò, áAbner.>>

Te uAbner na aman pa, <<Mmaḅu uda bu wór uponzhi yà?>>

¹⁵ UDawuda là pa, <<Mmaḅu nza apir anəm yà? Uda wa mmaḅu ka ashe oIsarila yà? Iza nak kang u pángchí unəm uga nzhi bu uponzhi kaṭ yà? Nna gbang nvang chit kaṭ unəm uro ba pa u gbál unəm uga nzhi bu uponzhi.

¹⁶ ÁAbner, iyam va ta u nəm ta á byen kaṭ. Wa nva uYawe uwa yà ká irirì te, mmaḅu ká onungwan bu nkpak pa ó kú, kaḱul ó pángchí unəm uga nzhi wó, ugargar àYawe kaṭ. Ó dər,

abár ká abang ndəng àponzhi va ká dat ká ishishi te, ká che yà?>>

¹⁷ Nvangva uShawulu nyi ichu àDawuda te, uza là pa, <<Ichu bu yà dō, ayen mi, uDawuda?>>

Te uDawuda na aman pa, <<À ichu mi yà, anəm uga nzhi mi, áponzhi.>>

¹⁸ UDawuda ga mpyal ká nlà pa, <<Iza bu bàk uzwal bu ká yà, anəm uga nzhi mi? Iza n nəm yà, kang iza mpat mi yà?>>

¹⁹ Nyangmata re unəm uga nzhi mi uponzhi á gwong achwang ká nnap-nlà azwal wò. A yà pa uYawe à nok bu pa na u nəm ikum ká mi te, re uza á kam iyam inana mi. Nnyi te, a yà pa nnap va ta onəm à nəm te, re uYawe á vyap oza. Oza bàk mi ká nda va ta kakul pa na kang n ya nkap ká ashe iyam akup aYawe kat, kang oza là pa, <Ga wop inan iro.>

²⁰ Nyangmata kang wa re mmá gbál mi ká ashe mbin nkak va gbəgbang ká mpyal àYawe kat. Sang kang uponzhi oIsarila i fa nram ibebe wa mmami pa ô gbál yà? Sang kang bu fa abar mi wa inyil iro iga apal abam yà?>>

²¹ Te uShawulu là pa, <<N nəm nnap mbángbang chit, le ba, ayen mi uDawuda. Mi yà ká nənəm iyam iro a bu lap kat, kakul nva u dər irirì mi ká ichumchum kang u re mi nda va ta á. N nəm mpərək, mpat bang byet.>>

²² UDawuda là pa, <<Abár bu na ta, áponzhi. Re uro ká ashe ovan nza bu á ba na á kam.>>

²³ UYawe i mwa udanggo kakul inənənnənən ká nna nnandərnandər. UYawe na bu ká ashe

awo mi ká n̄da va ta, n̄nyi te, n ndok ugargar àYawe kat.

²⁴ Wa nva n dər irirì bu ká ichumchum ká n̄da va ta te, re uYawe a dər irirì mi ká ichumchum, kang ì fa ka mi ka ashe nkpaktak mbək anung.>>

²⁵ Te uShawulu là ûDawuda pa, <<Re nnap nnənan á yà ka apal bu, ayen mi, uDawuda. Bu ga nnəm oga iyam ichumchum, kang bu nəm igwan pa makmak.>>

Te uDawuda ga iyam wò, kang uShawulu le nzhi.

27

UDawuda tēm ka ashe oFilisti

¹ N̄nyi te, uDawuda kat ka ashe ìgwak wò, á là pa, <<N̄da nro na mi wong mi kú ka ashe awo aShawulu. Iyam va byen pa n nəm te, mi chər mi ga mbin oFilisti. Te uShawulu i re nram mi ðak ka ashe mbin àIsarila, kang mi fa ka ashe awuwo.>>

² Te uDawuda ká onunggwan wò ìgbal pa ìkpəding oza ga atak aAkish uya aMayok, uponzhi uga aGat.

³ UDawuda ká onunggwan wò ká nzhi oza tēm ka atak aAkish ka aGat. UDawuda ga n̄zəng ká ochar wò oga oparəm, uAhinoyam uyen uga aJezerel, ká uAbigel uyen uga aKarmel, uchar ukpələng àNabal.

⁴ Nvangva mmá là ûShawulu pa uDawuda chər chit ga aGat te, uza re nram na.

⁵ Te uDawuda là ûAkish pa, <<A yà pa nchər mi bəbal kà mpyal bu te, na atak aro á mi ka ashe

ivan itong n təm kà. A màl pà uzwal bu a təm nzəng kà bu kà ashe ìnang itong iga iponzhi kàt.>>

⁶ Te n̄da vā ta uAkish na itong aZiklak á na, nna nak te, aZiklak təm ajiwo oponzhi oga aYahuda a ba chu nda vā ta.

⁷ UDawuda təm kà mbin oFilisti ìzun pà ìzəng kà ape pà neding.

⁸ Nyangmatà uDawuda kà onəm wò nəm inok ngga kà ìkum onəm oga aGeshur, kà aGirzi, kà aAmalek. Kà mmatmat te, onəm vā ta təm kà mbin vā ta ga chu aShur kà aMasar.

⁹ Awalang vā uDawuda i ru atak kà ìkum te, uza i re ununggwan kà te uchar kà irirì kàt. Uza i wur itam, kà ina, kà oga azhaki kà oga alakəmi, kà ilukwan. Te uza i le atak aAkish.

¹⁰ Awalang aro te uAkish i bəp pà, <<U ga ìkum kà che nda vā ta yà?>> Te uDawuda i là pà, <<N ga kà nk wandal aYahuda>> kà te, <<Kà nk wandal aJerameyel>> kà te, <<Kà nk wandal oKeni.>>

¹¹ UDawuda i re ununggwan kà te uchar kà irirì kàt, kakul kang oza a ga aGat a là pà, <<Iyam vā ta uDawuda nəm.>> Nnap nnənəm nata uza i nəm pà dəkər nva uza kà ntəm kà ashe oFilisti á.

¹² UAkish na nnandər kà uDawuda, kang a là îshi wò pà, <<Uza sat iyam iga ajan chit ònəm wò oIsarila, nyangmatà te, uza i yà uzwal mi nk paktak iriririri.>>

28

¹ Kà ashe oga nra vā ta te, oFilisti but oshozha oza pà ó lung ìkum kà oIsarila. Te uAkish là ûDawuda pà, <<Á màl pà u nyi pà, mma bu kà onəm bu, i gwang ishi kà mi kà ìkum vā ta.>>

² UDawuda là pa, <<Á chàng byet. Bu ya ká ishi bu iyam va mi nənəm.>>

Te uAkish na aman pa, <<Dakdak, mi ga nnak bu ya ushozha uga mpángchí mi mbyet.>>

UShawulu ga atak achar uga ivak

³ Nyangmata uSamuwel kú chit, kang nkpaktak oIsarila yéng ikuku kang oza li na kà itutong ka aRama. UShawulu ka wà onəm oga ishi ibolbol ká onəm oga ivak chit ka ashe mbin va ta.

⁴ OFilisti but kang à ba pak apak oza ka aShunem. UShawulu nnyi te, but nkpaktak oIsarila kang oza pak apak ka aGilbowa.

⁵ Awalang va uShawulu ya oshozha oFilisti te, ichəgwak ləp na, ayər nəm na pa gənggəng.

⁶ Uza mwo ndom aYawe, nnyi te, uYawe na aman á na ka atak nlár izwam, kat te ka atak aUrim,* kat te ka atak onəm oga nlà ichu Inan kat.

⁷ UShawulu là onəm oga nəm inok á na pa, <<Ó ram uchar uga ishi ibolbol á mi, na n ga m bəp na iyam va i ga nfa.>>

Oza là pa, <<Uchar uga ishi ibolbol uro uwa ya ka aEndor.>>

⁸ Te uShawulu mwak ilukwan iro pađi na ô lar ishi wò, kang uza ga nzhi achar va ta ká izwam ká onəm wò oro pa oparəm. UShawulu là pa, <<Wór aruhu anəm ukúkú uro á mi, wong ká unəm va á mi, mi wór adidín.>>

⁹ Nnyi te, uchar va ta là á na pa, <<Nnandər u nyi iyam va nyi uShawulu nəm. Uza bək

* **28:6 28.6** aUrim: Iyam va unəm uga mpyal awop i nəm inok ká pa na ô nyi ndòm Inan.

nkpaktak onəm oga ishi ibolbol ká onəm oga ivak ka mbin va ta. Te sang kang bu lwak ajip á mi kakul pa mmá gbál mi yà?>>

¹⁰ Te uShawulu sɔng anung á na ká adin aYawe pa, <<Wa nva uYawe uwa yà ká irirì te, iyam iro yà i ya bu kakul nnap va ta kat.>>

¹¹ Te uchar va ta bəp pa, << Uda u dom pa m ba ká na á bu yà?>>

Te uShawulu là pa, <<Le ba ká uSamuwel á mi.>>

¹² Awalang va uchar va ta ya uSamuwel te, uza ləp achu pa gbáŋgbáŋg kang à là ûShawulu pa, <<Sang kang u lam mi yà? Mmaɓu uShawulu.>>

¹³ Uponzhi là á na pa, <<Kang ayər a nəm bu kat. Iza u ya yà?>>

Uchar va ta là pa, <<N ya aruhu aro kà nfa ka ashe mbin.>>

¹⁴ Uza bəp pa, <<U ya na wa nsang yà?>>

Uchar là pa, <<Unəm ugbakgbak pá ilukwan iwángwang kà nfa.>>

Te uShawulu nyi pa uSamuwel, kang uza ru zəp ká afu kà mbin.

¹⁵ USamuwel là ûShawulu pa, <<Iza nak kang u dak mi ká atak ngwong ká mi wanta yà?>>

UShawulu là pa, << Mmami ká ashe ndaktak pa gənggəng. OFilisti kà nlung ikum ká mi, kang Inan re mi chit. Uza na aman a mi ká atak onəm oga nlà ichu Inan, kat te ká atak nlár izwam lap kat. Nna nak te, n wór bu pa na u là iyam va á mi, n nəm.>>

¹⁶ USamuwel là pa, <<Bu bəp mi ká iza yà? Nna uYawe re bu chit, kang à sat ukpa ikum bu chit á.

17 UYawe nəm chit wa nva uza ka là ka anung mi á. UYawe kakchi iponzhi chit ka awo bu, kang à na ûnəm uro uga ndatkulung ká bu, uDawuda.

18 Kakul u yang ká nkpak nnap-nlà àYawe kat te ònyám nlak ìgugwak ka apal oAmalek te, uYawe nəm iyam va ta a bu chit nda va ta.

19 UYawe i ga nna bu ká oIsarila ka ashe awo oFilisti, kang ipin mmabu ká ovan bu onungguan ó ga nya nzəng ká mi. UYawe i ga nna oshozha oIsarila ka ashe awo oFilisti kpa.>>

20 Ká nfe nnap-nlà va uSamuwel là á na byet te, uShawulu ru zəp ká afu ka mbin, kakul ayər nəm na pa gənggəng. Uza bəlak kakul uza ri iyam iro ka nda va ta kat, izwam ká alum.

21 Awalang va uchar va ta ba atak uShawulu te, uza ya na ka ashe ndaktak pa gənggəng, kang à là á na pa, <<Dər, uzwal bu a kpak nnap nnəm á bu chit. N na irirì mi kang n nəm iyam va chit u là á mi pa n nəm.

22 Nyangmata, kusuk gwong achwang ka iyam va uzwal bu i là á bu. Re n na iyam-nrì á bu ú ri na ú ya ikam iga nle.>>

23 Uza yang kang à là pa, <<Mi ri kat.>>

Nnyi te, onənəm ká uchar va ta gwang chál na kang uza man, te uza wong ká mbin təm ka apal alyər.

24 Uchar va ta kpán iya ina va uza ka kang byen ka nzhi wò, te uza ghan ga kpán pà. Uza kpak mmak kál kang uza bit nzəngkəng ngga nya ká anyer kat.

²⁵ Te uzạ bạ ká kà mpyal àShawulu ká onənəm, kang ozạ ri. Te ozạ wong kang ozạ ga ká izwam vạ ta.

29

UAkish re uDawuda le ga aZiklak

¹ OFilisti but nkpaktak oshozha ozạ kạ aAfek, ñnyi te, oIsarila ra apaḳ kạ anung ndəng mbəlbəl kạ aJezerel.

² Nvạ onəm oga mpyal oFilisti fa chit ká oshozha igbəl igbəl ká ikalong ikalong te, uDawuda ká onungwan wò kạ mbạ kạ nvang nzəng ká uAkish.

³ Onəm oga mpyal oshozha oFilisti bəp pa, <<OHiburu vạ tạ i nəm izạ kạ tạ yà?>>

UAkish na amaṇ pa, <<Unəm vạ tạ uDawuda ukpari aShawulu uponzhi oIsarila. Uzạ yà chit nzəng ká mị ji izun pạ izəng, kang na n ya mpat nro chit kạ atətak kaṭ bən kạ nda vạ uzạ re uShawulu ká bạ chu ñyangmatạ.>>

⁴ Ñnyi te, igwak lak onəm oga mpyal oshozha oFilisti kà uAkish, kang ozạ là pa, <<Re unəm vạ tạ á le a ga atak vạ u nạ á nạ pạ uzạ a təm kạ. Uzạ i yà ká ngga ikum nzəng ká yị kaṭ, le kang uzạ a wong a gabạn ijili ijang ká yị kà mpyal ikum kaṭ. Mwote asaḷ vạ tạ uzạ a damshi ishimshe wò ká ká unəm uga nzhi wò kạ atak ngbáng onəm yị nggo.

⁵ Rəng, uDawuda vạ tạ mí shì nnap ká nạ kạ ashe ngbap nzạm mí là pa, <<UShawulu gbáng oji wò ikalong, kang uDawuda gbáng oji wò ikalong pạ igbapchi.>>

⁶ Te uAkish wór uDawuda là á na pa, <<Nva uYawe uwa ká irirì, mmabu unəm ukin, n òm pa u ga ìkum nzəng ká oshozha mi. A bàn ká nda va u ba ká te, na n ya bu chit ká mpat nro kat ba chu nda va ta. Nnyì te, nkpaktak onəm oga mpyal man ká bu kat.

⁷ Nyangmata le ga ká ikánkáng, kang wa nəm iyam iro iva i lak igwak ònəm oga mpyal oFilisti kat.>>

⁸ UDawuda bəp pa, <<Iza n nəm yà? Nza mpat u ya ukpari bu ká ban ká nda va m ba ká ba chu nyangmata yà? Iza nak kang mi ga mi lung okpa ikum anəm uga nzhi mi uponzhi kat yà?>>

⁹ UAkish na aman pa, <<Ka atak mi te, nnap nnəm bu á byen ká mi wa amaleka Inan. Kap ka nna te, onəm oga mpyal oshozha oFilisti là pa bu yà ká ngga ikum nzəng ká yi kat.

¹⁰ Nyangmata te, ipin ká ibotak wa fa nzəng ká onəm oga nnəm inok unəm uga nzhi bu va ba nzəng ka bu. Nvangva atak ban ghan chit, te ó kpán asal.>>

¹¹ Te uDawuda ká onəm wò wong ká ipin kpan asal pa o le o ga mbin oFilisti, nnyì te, oFilisti kyen ga aJezerel.

30

UDawuda ga ikum kà OAmalek

¹ Ka nvangva uDawuda ká onungwan wò ba chu aZiklak ká nra ngga nshatding te, oza ya oAmalek ru aNegep ká aZiklak chit ká ikum. Oza pwak aZiklak pa chatchat,

² kang oza wur ochar ká nkpaktak onəm va ka ashe itong va ta, ovan ká onəmgbak. Oza gbál unəm uro kať, ñnyi te, oza wur oza ga ká.

³ Awalang va uDawuda ká onəm wò chu aZiklak te, oza ya mmá pwak itong va ta chit, kang mmá wur ochar oza ká ovan ochar, ká ovan onunggwan oza chit ka ikum.

⁴ Te uDawuda nzəng ká onəm wò yəng pa gənggəng, oza ga lang ikam iga ayəng.

⁵ Mmá ka wur ochar aDawuda oga oparəm uAhinoyam uga aJezerel ká uAbigel uwa ubəbar ka ya uNabal unəm uga aKarmel á.

⁶ UDawuda ya ka ashe ndaktak pa gənggəng, kakul onəm kà nlà pa ó gwan na ká ipang, kakul udanggo ka ashe nlak igwak, nva oza lang ovan oza onunggwan ká ochar. Ñnyi te, uDawuda dar nkàm ka atak aYawe Inan wò.

⁷ Te uDawuda là ûAbiyatar unəm uga mpyal awop uyen nunggwan aAhimelek pa, <<Ba ká ilukwan ikwoksok á mi.>> Kang uAbiyatar ba ká á na,

⁸ kang uDawuda bəp uYawe pa, <<M bàk nvaŋg onəm va ta ba ru yi ká ikum dō? Mi bàn oza bàn dō?>>

Kang uYawe na aman pa, <<Ga, bàk nvaŋg oza, bu bàn oza bàn kang bu vyat nkpaktak iyam va oza wur ká ikum.>>

⁹ UDawuda ká onunggwan wò igbál pa ikpading va nzəng ká na ru asal ngga, kang oza ba chu awang aBesor te, oro tong kaťa.

¹⁰ Onəm igbál pa iparəm ba bəlak mpang awang mať oza, ñnyi te, uDawuda ká onəm igbál pa ineding ga mpyal ká mbàk oza.

11 Onəm aDawuda ga ya unəm uga aMasar uro ka ashe nzam, kang oza ba ka na ka atak aDawuda. Oza na ndəng á na ka iyam-nri pa á ri,

12 oza na awar ipipyen ibitbit á na ka awar ibangbang ibitbit pa iparəm. Nvangva uza ri te, nnap nnənəm ba, kakul nra pa ishatding uwa ri iyam iro kat te wa iyam iro chit kat izwam ka alum.

13 UDawuda bəp na pa, <<Uda unəm uga nzhi bu ya? U fa ka che ya?>>

Uza na aman pa, <<Mmami unəm uga aMasar, uzwal anəm uga aAmalek uro. Unəm uga nzhi mi re mi ka nvang nra chit pa nshatding kakul n rurwa.

14 I ru aNegep aga aKeret ka ikum, ka aNegep aga mbin aYahuda, ka aNegep aga mbin aKalep. Kang í pwak aZiklak kpa.>>

15 UDawuda bəp na pa, <<Bu məman bu ga ka mi ka atak onəm ikum va ta dò?>>

Uza na aman pa, <<A ya pa bu sóng anung á mi ka adin Inan pa bu ya ka ngbal mi kat, kat te bu na mi ka ashe awo anəm uga nzhi mi kat, te mi ga ka bu ka atak oza.>>

16 Uza ga ka uDawuda ka atak oza, kang uza ya oza pəl chit ka ashe agbagba, oza ka nri ka ngwa ka ngbap nza ka nchang izər kakul nkpktak iyam iga ngwur ka atak ikum va oza wur ka mbin aFilisti ka mbin aYahuda á.

17 UDawuda ru oza ka ikum ka arurong va ta ga chu arurong aga ipin ikpakpak. Unəm uro ya lar kat, ya ovan nza oro igbal pa ineding ova chəng ka apal oga alakəmi oza chwat.

18 UDawuda vyat nkpaktak iyam va oAmalek wur, nzəng ká ochar wò va pa oparəm.

19 Iyam iro yà lar kaṭ, ibwakan kaṭ te ichum-chum, ovan onunggwan kaṭ te ovan ochar. UDawuda le ká nkpaktak iyam va oAmalek wur ká ikum.

20 Uza wur nkpaktak itam ká ibəl, ina ká alakəmi oAmalek nak kà mpyal iji oza kang onənəm wà nggatək iyam nkang va ta nzəng ká iji oza, i là pa, <<Iyam iga ngwur ka atak ikum aDawuda nna ta.>>

21 Te uDawuda le atak onunggwan oga igbaḷ pa iparəm ova ka bəlak chit, achen maṭ oza kang mmá ka re ka nvaṅg ka awang aBesor. Oza fa pa ó gwang uDawuda ká onəm va nzəng ká na. Nvaṅgva uDawuda ká onəm wò ba chu te, a re anung ôza.

22 Nnyi te, nkpaktak onəm onga ká onəm olakchilakchi ka ashe onəm aDawuda là pa, <<Kaḱul oza ga nzəng ká yi kaṭ te, i yà ká nkap iyam iga ngwur ka atak ikum nzəng ká oza kaṭ. Ká nna te, nza unəm nggo a yar uchar wò ká ovan wò na á ga.>>

23 Nnyi te, uDawuda na aman ôza pa, <<Pa kaṭ, ogənang mi, kang o nəm pa ká iyam va uYawe na á yi kaṭ. Uza kpak yi kang à na okpa ikum yi chit ka ashe awo yi, ova ba ru yi ká ikum á.

24 Uda i gwong achwang ka iyam va ta mmawó ka nləla yà? Unəm va ga ikum ká unəm va təm mpángchí ayi te, mí kap iyam nkár.>>

25 Á bən ka nda va ta ba chu nda va ta, uDawuda nak iyam va ta sat nnap mpakpak ká nnap nnəm

ka ashe oIsarila.

²⁶ Awalang va uDawuda chu aZiklak te, uza re nre ka iyam iga ngwur ka atak ikum iro onem oga mpyal oYahuda, ova okpækpa, uza la pa, <<Imwa nata kakul wó, í wur ka atak okpa ikum aYawe.>>

²⁷ Uza re nre ka imwa va ta onem oga mpyal oga itong va ta, aBetel, ka aRamot Negep, ka aJatir,

²⁸ ka aAroya, ka aSipmot, ka aEsstemowa,

²⁹ ka aRakal, ka oga itong oJeramel, ka itong oKeni,

³⁰ ka aHorma, ka aBor Ashan, ka aAtak,

³¹ ka aHebron ka nkpaktak aboshi oga atak va uDawuda ka onem wò chen ka.

31

Ikú aShawulu ká ovan wò onunggwan

(1 Nnap Nshet 10.1-12)

¹ Ka ashe ngga te, oFilisti ru oIsarila ka ikum, kang onunggwan oIsarila cheng ka mpyal oFilisti. OFilisti gbang oza pa makmak ka agager aBam aGilbowa.

² OFilisti bak uShawulu ka ovan wò onunggwan, kang oza gbang ovəvan oga oshatding uJonatan ka uAbinadap, ka uMalkishuwa.

³ Ikum sur chit pa gənggəng ka apal aShawulu, kang ovan onunggwan oga ijang oFilisti nak abang á na məmak.

⁴ UShawulu la unem uga wur iyam ikum wò pa, <<Tur ndokchi bu na u gbál mi ká, le kang onem oga ache amulur va ta a ba a kpan mi a na idumdum á mi, a nap avyal ká mi kat.>> Nnyi te, unem uga ngwur iyam ikukum yang, kakul ayər

nəm na nəm. Te uShawulu yar ndokchi kyer ishi wò ká ru kú.

⁵ Awalang va unəm uga ngwur iyam ikum aShawulu ya uza kú chit, te uza yar ndokchi wò kyer ishi wò ká, uza ru kú nzəng ká na.

⁶ Wanta na uShawulu ká ovan wò onunggan oga oshatding, ká unəm uga ngwur iyam ikukum, ká nkpaktak oshozhashozha, oza kú nda nzəngtəng.

⁷ Ká nvəngva oIsarila va ka gwong mbandam aJezerel ká ova ka gwong awang aUrdun ya pa oshozha oIsarila chəng chit ká mpyal ikum kang uShawulu ká ovan wò onunggan kú chit, te oza re oga itong oza, a chəng. Kang oFilisti ba ra ka ashe oga itong va ta.

⁸ Ipin fa kpak te, oFilisti ga pa na o wur iyam onəm va mmá gbəng te, oza ya akúm aShawulu ká ovan wò onunggan oga oshatding ka apal aBam aGilbowa.

⁹ Kang oza gəl ishi aShawulu oza zəp iyam ikukum. Te oza re nre ká onəm oga nre ka ashe nkpaktak mbin oFilisti, pa oza a ga ka nnapnlà nchəngchəng va ta ka atak nzhi ichər oza ká nkpaktak onəm oza.

¹⁰ Oza nak iyam ikukum ka ashe nzhi aAshtoret, kang oza ran akúkum ka izər akamsəlang itong aBet Shan.

¹¹ Kang onəm oga aJabesh Gileyat fe iyam va oFilisti nəm ũShawulu te,

¹² nkpaktak ovan onunggan oga nkam igwak ka ashe itong va ta chen ka ashe izwam va ta ga aBet Shan. Oza ga wur akúm aShawulu ká ovəvan onunggan va oza ran ká izər

akamsəlang aBet Shan á. Oza_ ba ká_ oza_ ká_ aJabesh, oza_ shì izər oza_ kata.

¹³ Te oza_ wur akup oza_ kang oza_ li ka_ avəng ìkun atamariki ka_ aJabesh, kang oza_ yar ndəng gbàl nra pa_ nfangshat.

Tarok Bible

The Holy Bible in the Tarok language of Nigeria

copyright © 2024 Luke Initiative for Scripture Translation

Language: (Tarok)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 19 Dec 2025 from source files dated 10 Jul 2025

501af3c5-12fd-5965-ade7-9600b2d02717